
KANDA
KU PIIZII
DA JEHOVAH

DEE WÖUTU WANWAN

KANDA KU PIIZII DA JEHOVAH

—1 KLONIKI 15:16

DEE WÖUTU WANWAN

Në

Kemeente

**Di buku aki an ta sei. Di buku aki sikifi u heepi sɛmbɛ u ko lei sabi Bɛibel.
Sɛmbɛ ta da mɔni u heepi taa di wooko aki du a hii goonliba.**

Ee i kɛ da mɔni, nɔɔ gaantangi go a donate.jw.org.

*Kanda ku piiizii da Jehovah–Dee wɔutu wanwan
“Sing Out Joyfully” to Jehovah–Lyrics Only
Hɔndima-liba 2020*

Saramaccan (sjjyls-SRM)

© 2018

Watch Tower Bible and Tract Society of Pennsylvania

Dee sɛmbɛ dee mbei di buku aki

© Druck und Verlag:

Wachturm Bibel- und Traktat-Gesellschaft, Selters/Ts.

Made in Germany



sjjyls-SRM
200602

Di fa dee kanda paati

| | |
|---|---------|
| <i>Jehovah</i> | 1-12 |
| <i>Jesosi/Di lusupaima</i> | 13-20 |
| <i>Di Könuköndë</i> | 21-24 |
| <i>Dee salufuwan ku dee woto sikapu</i> | 25-27 |
| <i>Di fasi fa u sa ko dë mati u Jehovah</i> | 28-40 |
| <i>Begi</i> | 41-47 |
| <i>Te u buta u libi a Gadu maun</i> | 48-52 |
| <i>Di diniwooko fuu</i> | 53-84 |
| <i>Te u ta ko makandi</i> | 85-93 |
| <i>Di Wöutu u Gadu</i> | 94-98 |
| <i>Dee baaa ku dee sisa fuu</i> | 99-103 |
| <i>Dee fasi di Gadu abi</i> | 104-130 |
| <i>Famii/Mati</i> | 131-138 |
| <i>Di biibi di u abi</i> | 139-147 |
| <i>Gadu o puu u a fuka/</i> | |
| <i>Sëmbë di dëdë o toona weki baka</i> | 148-151 |

1 *Dee fasi dee Jehovah abi* (Akoalimbo 4:11)

1. Jehova'u Tata, i da'i Gadu fuu.
I mbei di sonu, i mbei dee teeja tu.
A dee son' dē u ta si'i makti fii.
U teego deo dē fuu sa ta si.
2. Jehova'i ta leeu fau musu libi.
Hiniwan daka u ta si'i köni fii.
Di Bëibel hën ta leeu dee wëti fii.
Teu lei soni nëën, winiu ta si.
3. I leeu taai lobiu, nöö hën'u ta si tu.
Fëën mbei woo konda hii dee bunui ta du.
Teu luku hii dee bunu fasi fii,
nööu ta kë gafai ku hiiu hati.

Jehovah da di në fii

(Psalöm 83:18)

1. Di Gadu di dë tuu,
ta libi mbei hii soni.
Hinwan ten sëmbë sabi,
Jehovah da'i në fii.
A dë wan gaandiu wai,
u ko makandi ai në.
A hii lö, nasiön, hii së,
woo gafa'i gaan në fii.

(PIKI U DI KANDA)

Jehovah, Jehovah,
tu Gadu fii an dë.
Na a liba, naa goonliba,
dean dë a na wan së.
Gadu, ju tö nööa' hii makti.
Hii sëmbë'm sa'i son' dë.
Jehovah, Jehovah,
waa' woto Gadu möön, i nöö.

2. I ta mbei u ko toon
hiniwan soni di'i kë
fuu sa du andi i kë.
Jehovah da'i në fii.
Kotoigi fii u dë.
Iseei wë dau di në dë.
A bigi dau u tjai në.
U ko toon sëmbë fii.

(Piki u di kanda)

3

I ta heepi u ta taanga di biibi fuu (Nöngö 14:26)

1. Wë Jehova'i du wan bunu dau,
nööu seei u lobiën tu.
Hii dee sëmbë deeu ta miti,
u kë de ko sabi.
Ma so juu di libi taanga dau
te useei u ko ta wei.
Nöö di biibi diu bi abi,
hënseei ta ko swaki.

(PIKI U DI KANDA)

*I ta heepiu ta taanga
di biibi fuu.*

Söseei i ta leeu soni tu.

*U ta paaja di buka
da hii sëmbë.*

Ju nöö wë sa mbei wa ta fëëë.

2. Wë u kë fii dau wan hati tu
di an'o sa fëëkëtë.

Te dee fuka bi ta mitiu,
hii juui bi ta sai dë.

Te mi ta sindo ta pakisei,
nöö mi ta kë dai tangi.

Hatiu mi ta dë ku piizii
u konda soni fii.

(Piki u di kanda)

4

Jehovah hën ta tja mi

(Psalöm 23)

1. Jehovah Gadu ta tjaa mi.

Mi da wan sikapu fëën.

A sa' dee soni dee mi ta kë.

A saand' mia' fanöudu tu.

Kamian di bunu da mi,

naala a ta tjaa mi go.

A ta lei mi hii juu fa'a lobi mi.

A ta mbei mi feni böö.

Mi ta si hii juu fa'a lobi mi.

A ta mbei mi feni böö.

2. Jehova'i ta da mi taanga.

Hën mi ta si hii daka.

Wë heepi mi be ma du soni

dio mbei taa mi poi'i në fii.

Ee hii kamian ta dungu,

mio sa dë ai tii basu.

Na wan sonio dë di o mbei m'ta fëëë,

u di'i dë mi Gadu tu.

Soni an'o dë dio ta mbei m'ta fëëë,

u di'i dë mi mati tu.

3. Jehovah i wë ta tjaa mi.

Mio du dee sonii taki.

Di fasi fa i ta heepi mi

ta lei taa i lobi mi.

I da wan makiti Gadu.

Tem' dë kui, nöö ma ta fëëë.

Mi këi hoi mi taanga a'i pasi fii.

Ai së wë mi ta kë dë.

Mi ta kë si fa i lobi mi.

Ai së wë mi ta kë dë.

5 *Dee foombo soni Gadu ta du* (Psalöm 139)

1. Jehovah mi sa' taa i sabi

hii dee soni dee mi ta kë ta du.
Dee son' dë tuu wë i ta öndösuku.
Hii son' di dëa mi hati dendu
i ta si.

I tjubi mi ufö de pai mi.

I bi ta si fa bonuu mi ta göö.
Wë hii dee soni dë tuu i bi sabi.
Fëen mbei mio gafai da
di Gadu fasi fii.

Jehovah, ju wë mbei soni a mundu.

Dee son' deei du ta bigi da mi tee.
Te mi ta si taa'i libi ta ko taanga,
mi sabi taa joo sa ko heepi mi.

Naasë mio tjubi dai, Jehovah?

Naasë mio go te nöö ja sa si mi?
Eem' dëa dungu, tökuseei joo sa si mi.
Kamian an dë di Jehovah
an ta si.

6

Dee soni a mundu ala ta lei fa Gadu bigi tjika

(Psalöm 19)

1. Jehovah mbei sömëni sonia mundu.

A hii së u ta si

dee soni deea ta du.

Di köni fëen, hii dakau ta si ën.

Di sonu ku dee teeja seei

Jehovah mbei de tuu.

2. Dee wëti fëen ta mbei u ta dëa libi.

Di fasi fa'a ta tii

bunu da hii sëmbë.

Di Wöutu fëen hën ta konda di tuu.

Teu libi ku dee son' dë tuu,

woo dë wan mati fëen.

3. A bunu te u ta lespeki Gadu.

Dee wëti dia ta dau

o mbeeu feni libi.

Boo gafëen tu u dee son' deea ta du.

A lobiu, nööa ta heepiu tu.

Fëen mbei woo ta diniën.

7 *Jehovah hën ta da u kaakiti* (Jesaaja 12:2)

1. Gadu Jehovah, i ta dau taanga.
Ju ta ko heepiu te u dëa fuka.
Fëen mbei woo paaja di bunu buka.
Waa' toobi ee sëmbë an kë haika.

(PIKI U DI KANDA)

*Jehovah Gadu, i mbe'u ko taanga.
Di santa në fii hën u ta tja.
Ju da di Gadu di ta heepiu tuu.
Ju nöö sa puuu a hii dee fuka fuu.*

2. Sömëni wini dë diu ta feni,
teu buta mëni a di Wöutu fii.
Son' ta dë hia di u ta ko si.
Fëen mbe'u kë waka a di pasi fii.

(Piki u di kanda)

3. Gadu Jehovah, ju wëu ta futoou,
hii fa Saatan ta tja tesi ko dau.
Teu ko ai së i ta dau kaakiti.
Ju abi leti, nöö ju musu tii.

(Piki u di kanda)

8

Jehovah hën ta tjubi u

(Psalöm 91)

1. Jehovah hën ta tjubiu,
nöö hën u ta futoou.
Ao dë kuu eeu ta sukuën.
Wa musu go disëën.
Nöö nöiti ao disau fuu go.
Ao jabi maun, nööa kaau fuu ko.
Jehovah hën ta heepiu,
nööa kë fuu kuën dë mati tu.
2. Te sëmbë diu bi sabi
go disa'i Gadu fuu,
Jehova'o dau di köni
fuu saandiu musu du.
Wa musu fëëë andi ta ko,
a Gaduu musu kule go.
Te hogi ta ko mitiu,
ao ta heepiu, ao ta tjubiu.
3. Jehovah o ta tjubiu,
ao puu teu dëa fuka.
Alwasi'i libi taanga,
woo sa dou di'amanjan.
Soni an'o ta mbe'u ta panta,
alwasi naasë woo waka.
Jehovah hën ta heepiu,
nööa ta tii dee son' deeu ta du.

9 *Jehovah da di Könu fuu!*

(Psalöm 97:1)

1. Boo wai taau ta dini Jehovah.

Luku liba, nöö joo si di köni fëen.

Boo kanda da Jehovah, boo dëen tangi tu,
u dee bunu soni deea ta du.

(PIKI U DI KANDA)

*Gadu köndë ta wai, libisëmbë ta wai
taa Jehovah toon di Könu fuu!*

*Gadu köndë ta wai, libisëmbë ta wai
taa Jehovah toon di Könu fuu!*

2. Boo goa dee köndë go peleiki

taa Jehovah wanwan sa tjubi sëmbë.

Hën da di Könu fuu, hën fiti gafa tu.

Boo gafëen, boo tjökö kini dëen.

(Piki u di kanda)

3. Nöunöu di tiu Jehovah seti,

nöö di Mii fëen ta tii'i Könuköndë fëen.

Hii dee poipoi gadu

di sëmbë ta dini,

wë Jehova'o mbei de kisi sen.

(Piki u di kanda)

10 *Gafa Jehovah, di Gadu fuu!*

(Psalöm 145:12)

1. Boo kanda, gafa'i Gadu fuu
be hii sëmbë tuu ko gafëen!
Be de jei, son' u'i daka fëen,
ka ao puu hii hogi soni tuu.
Gadu taki taa di juu dou awaa
ka a buta di Mii fëen'u tii.
Goa hii pei sëmbë, nöö konda soni
u dee bunu Jehova'o du.

(PIKI U DI KANDA)

Boo kanda, gafa'i Gadu fuu!

Paaja'i buka a hii goonliba!

2. Boo kanda, gafa'i Gadu fuu
ku hiiu hati tuu, boo gafëen.
Boo ta wai, boo dëen tangi tu!
Konda soni u dee fasi fëen.
Di Gadu fuu abi sakafasi.
Hii dee son' a ta du bigi.
Di Tata fuu abi tjalihati.
A ta jei te u ta begiën.

(Piki u di kanda)

11 *Dee soni Gadu mbei ta gafëen* (Psalöm 19)

1. Taata Jehovah ju wë mbei soni,
nöö u ta si taai mbei de ku lobi.
Hii së kau go soni ta dë u si.
Fëen mbe'u kë gafai da di makti fii.
Hii së kau go soni ta dë u si.
Fëen mbe'u kë gafai da di makti fii.
2. A ju'u ta feni köni di sa tjaau.
Teu ta haikai, nöö i ta dau wan maun.
Dee wëti fii bunu da hii sëmbë.
De bunu möön hii soni diu sa bai.
Dee wëti fii bunu da hii sëmbë.
De bunu möön hii soni diu sa bai.
3. Sensi di daka diu ko dë mati,
wan suti libi hën u tuu feni.
I dau di gaandi fuu sa tja'i në fii.
U kë gafai ku soni diu ta du.
I dau di gaandi fuu sa tja'i në fii.
U kë gafai ku soni diu ta du.

12

Jehovah, di Gadu fuu

(Ēkisodesi 34:6, 7)

1. Gadu Jehovah, ju'u musu dini.
Ju wë da di Gadu fuu,
nöö iseei ta leeu di tuu.
Ju hën da lobi, nöö i'abi makti.
Nööi ta libiu teego tu.
2. Taata Jehovah, u kui da mati.
I ta jei dee begi fuu.
Hii ten seeii ta tjali kuu.
Ju wë ta tjaau kaa, nöö i ta heepiu.
Ju da'i Gadu di ta tiu.
3. Dee dinima fii, ëngëli seei tu,
hii de tuu ta kanda dai.
Hii ten de ta kë gafai.
Gadu Jehovah, ju fiti gafa.
Ju ta mbeeu ta dë ku wai.

1. Jehovah lobiu tuu.

Di dë useei ta si,
u di Jesosi paka'i zöndu fuu dau.
Jehovah bi mandëën
faa ko a goonliba,
nöö a bi du hii soni Gadu kë.

2. Di Keesitu bi ko,

a leeu sömëni son'.
Dee lei fëën Tata, deseei a bi leeu tu.
A bi ta du soni
kumafa Gadu kë.
Fëën mbei boo djeesiën a dee fasi dë.

3. Gadu ta wai kuu tu,

teu djeesi Jesosi.
Nöö boo ta tjau seei kumafaa bi libi.
Nöitiu musu disa,
wa musu dëa baka,
nöö Gaduo lobiu hiniwan daka.

14 *Gafa di Könu di o tii goonliba* (Psalöm 2:12)

1. Gaan hia sëmbë tja koa wan
u hii nasiön ku köndë.
Jesosi ku dee salfuwan
ta tja de ko makandi.
Di Könuköndë seti kaa.
Ao seeka hii di goonliba.
Wan gudu diu seei an sa paka,
di ta tja wini ko dau tuu.

(PIKI U DI KANDA)

*Boo gafa Jehovah, boo gafa Jesosi.
Gadu butëen kuma Könu fuu.
Hii sëmbë musu du andia taki,
hën wë da di Könu fuu.*

2. Gafa di Könu di ta tii.
A ko u puuu a nöutu.
Sömëni bunu dë ta ko,
nöö woo sa libiu teego.
Ao weki sëmbë koa libi.
Di libio sutia goonliba.
Boo wai ku di Könu Jesosi.
Hën da Gaamau bööböö libi!

(Piki u di kanda)

1. Boo gafa di Könu,
di Mii u Jehovah seei.
Ao mbei soni ko bunu.
Di tii fëen u musu tei.
A abi sakafasi.
A lo' Jehovah në.
Ao puu soni a pasi
faa du'andi Gadu kë.

(PIKI U DI KANDA)

Boo gafa di Könu!

Di tii fëen dë nöunöu kaa.

A dë ta tii a liba.

Ao tii hii di goonliba!

2. Boo gafa di Könu,
di Gadu buta u tjaau.
Hën wë paka di zöndu.
A ko puu a dëdë maun.
Di Könuo dë makandi
ku hii dee salfuwan,
nöö de o seti soni
u tii di goonliba.

(Piki u di kanda)

16 *Gafa Jehovah u di a salufu di Womi Mii fëen* (Akoalimbo 21:2)

1. Jehovah butëen Womi Mii
faa tii kuma Könu fuu.
Ao du sonia wan leti fasi,
nöö soni o waka bunu.

(PIKI U DI KANDA)

*Boo gafa di Mii u Jehovah.
Boo gafa di Könu dia dau.
Woo piki'ën buka a hii soni tuu.
U feni sëmbë u tjaau.
Boo gafa di Mii u Jehovah.
Lespeki di Mii dia buta.
Jehovah hën dëen di makiti dë
faa tii hii di goonliba.*

2. Jesosi ku dee salfuwan
o dë a liba ta tii.
Deo seeka soni a goonliba,
nöö hii sëmbëo ta libi fii.

(Piki u di kanda)

1. Keesitu bi lo' hii sëmbë.
Fëen mbei a ko puuu a dëdë.
A bi koa goonliba
ko puuu a fuka.
A du dee soni Gadu kë.
Ee wan sëmbë bi ta siki,
nööa tjëen sëmëni jaa longi,
eea bi haksi Jesosi u kulëen,
a bio pikiën taa: „Wë mi kë.”
2. U kë djeesi Jesosi tu,
a hii dee soni deeu ta du.
U kë heepi sëmbë
u koa Gadu së.
De sa ko dë mati fëen tu.
Ee wan baaa dë a wan fuka,
nöö ja musu waka pasa.
Mbei hii möiti fii heepi di baaa dë.
I sa taki taa: „Wë mi kë.”

18

U tei di lusupaima u bigi

(Lukasi 22:20)

1. U ko tide

Jehovah Gaduu dai tangi,
u di'i lei taai lobiu tee,
nööu ta tei en'u bigi.
I manda'i Mii fii ko
fuu sa feni libi.
Di paima dia paka
o mbei taa u sa ko fii.

(PIKI U DI KANDA)

*Jehova'u wai ku Jesosi.
Di buuu feen hen we mbe'u ko fii.
Tata Jehovah woo ta dai tangi,
ku hiiu hati.*

2. Lobi hen mbei

Jesosi ko a goonliba.
A bi ke ko dede dau
faa sa puu a fuka.
We zöndu mbei taa hii sembe
bio dede go.
Woo feni libi, nöo sembe
an'o ta dede möön.

(Piki u di kanda)

1. Jehovah u Tata a liba,
tide u ta mēni wan ten.
I bi mbei sēmbē si taa ku'i kaakiti fii,
sömēni sēmbē bi ko fii.
Di Pasika skapu bi mbei taa
dee sēmbē fii feni tjubi.
Bakaten hēn di Mii fii bi ko dēdē dau.
Hēn da'i Skapu dio mbei u ko fii.
2. Di bēēē ku di win ta mbe'u mēni
di paima di'i Mii fii paka.
Wē di son' di a du
mbe'u sa feni bunu.
Di Mii fii hoi dou tea'i kaba.
Woo mēni di dēdēu Jesosi.
Woo mēni fa'a puuu a fuka.
Wē di dēdēu di Mii
fii jabi'i pasi dau
fuu sa feni di teego libi.

3. Tideu ko makandi ai fesi.
Makandi u ko dai tangi.
U di'i lobi sēmbē,
nöö ja kë fuu dēdē.
Fēēn mbeii manda Jesosi ko.
Di son' di a du fiti gafa.
Di son' dē ta mbei u ta wai.
U kë waka hii daka a'i Mii fii baka,
fuu sa gafai, u lobi Tata.

20 *I da u di wan kodo Womi Mii fii*

(1 Johanisi 4:9)

1. Jehovah, u Tata,
i puuu a gaan fuka.
Di paima di'i paka,
hën wë mbe'u ko fii!
U kë ta libi dai.
Hën nöö u kë ta du.
U tuu ta kë gafai.
I da di Gadu fuu.

(PIKI U DI KANDA)

*I dau wan womi mii,
di Mii fii di'i lobi.
Woo ta kanda makandi,
fuu gafai da di lobi fii.*

2. Di lobi di'i abi,
hën mbe'u ko zuntu fii.
I kë fuu dë mati,
sö wë u ko si.
Mai du wan soni dau,
i puuu a dëdë maun.
I manda Jesosi,
hën mbei u sa ko fii.

(Piki u di kanda)

(KABA PISI)

Jehovah, u Tata, u kë dai tangi möön,
u'i Mii fii di'i manda ko dëdë da hii sëmbë.

1. Boo ta suku'i Könuköndë.

Hën Jehovah Gadu kë.
A buta di Womi Mii fëen
faa sa tii libisëmbë.

(PIKI U DI KANDA)

Suku'i Könuköndë fosu.

Hoi iseei a Gadu tu.

Suku Gadu leti fasi.

Du dee son' deea kë fii du.

2. Wa musu ta bookou hedi:

'And' woo njan, and' woo bebe?
Gadu saandi ua' fanöudu,
nöö ao dau dee son' dë tu.

(Piki u di kanda)

3. Heepi sëmbë u ko sabi
andi'i Könuköndëo du.

Be de ko ta biibi Gadu
ku di fasi fa'a ta tii.

(Piki u di kanda)

Di Könuköndë seti kaa *—Be a ko!*

(Akoalimbo 11:15; 12:10)

1. Jehovah sensten kaai bi dë.

Wë kaba fii an dë.

Di Mii fii di'i buta u tii,

ta tii kumafai kë.

Di Könuköndë seti kaa.

Di tii fëen'o dëa hii goonliba.

(PIKI U DI KANDA)

Awaa di juu dou taa

di Könuköndëo puu fuka.

Di Könuköndë dë.

Boo begi: „Bea ko. Be a ko!”

2. Kaba juu u Saatan zuntu.

U saandio pasa tu.

Hii fa u ta miti fuka,

dee bunuu ta si tu.

Di Könuköndë seti kaa.

Di tii fëen'o dëa hii goonliba.

(Piki u di kanda)

3. Dee ängel'u Gadu ta wai,
ta kanda ta piizii.
Di köndë u Gadu ko böö,
di Saata'an dë'ala möön.
Di Könuköndë seti kaa.
Di tii fëen'o dëa hii goonliba.

(Piki u di kanda)

1. Di tii u Gadu seti.

Nöunöu di Mii fëen ta tii.

Hën da di Könu di Gadu buta.

Keesitu dë a liba,

nöö a o tii goonliba.

Boo gafa Gadu

ku di Mii fëen Jesosi.

(PIKI U DI KANDA)

Andi di Könuköndëo du dau?

A o tja letilibi ko.

Andi di Könuköndëo du möön?

Ao mbei u libi u teego.

Boo gafa Masa Jehovah

u di soni di a du.

2. Di dakau Gadu ta ko,

nöunöu di ten an dë möön.

Saatan goonliba hën o pasa go.

Wë u ta libia di ten

kau sa paaja di buka.

Sömëni sëmbë

musu jei di buka dë.

(Piki u di kanda)

3. U lobi di Könu fuu.

Ao mbei u feni bunu.

Ao du hii dee soni di Gadu kë.

Hii sëmbë di kë libi

musu u ko nëën fesi.

Di daka ta ko

ka ao tii hii soni tuu.

(Piki u di kanda)

1. Luku, nöö joo ko si
fa di kuun'u Jehovah hei.
Luku, nöö joo ko si
ta'a dë kumafai bi jei.
Hii ten sëmbë ta ko.
De ta kmutu tea longi.
Möönmöön sëmbë ta ko,
u de sa dini Gadu.
A di ten di pasa
dinimau Gadu an bi hia.
Ma tide u ta si
taa de dë seei a hii goonliba.
Hia sëmbë ta ko,
de kë du'andi Gadu kë.
Hii ten de kë ta diniën,
nöiti deo go disëen.

2. Du'andi Jesosi du.

A bi pleiki da sëmbë.

Boo go sö taa useei sa
pleiki da sëmbë tu.

Boo wai ku Keesitu.

Hën ko dë di Könu fuu.

Boo go piki sëmbë
u de sa koa Gadu së.

U ta wai teu ta si
fa dee sëmbë nango a fesi.
Hii dee son' deeu ta du
ta mbei sëmbë ko sabi di tuu.

Boo go paaja'i buka
a hii sëu di goonliba.

Boo go heepi sëmbë
u de sa du'and' Gadu kë.

1. Dee salfuwan u Gadu,
wantu u dee mii dia tei.
A goonliba a tei de,
nöö a lobi de tu.

(PIKI U DI KANDA)

*Wan gudu, apaiti,
di ta tja di nē fii tu.
De lobii, ta gafai,
te de ta konda fai hei tjika.*

2. Dee salfuwan u Gadu
ta paaja di tuutuu lei.
Gadu puu de a dungu,
tja de ko a limbo.

(Piki u di kanda)

3. Wē de ta mbei hii möiti
u tja woto sēmbē ko.
De ta haika Jesosi.
De dē mati fēen tu.

(Piki u di kanda)

I du ën da mi

(Mateosi 25:34-40)

1. Bakamau Jesosi dë a hii goonliba,
nöö de tuu ta nama ku dee salfuwan.
De ta heepi de ku
sömëni soni tu.
Wë Jesosio mbei de feni gaan bunu.

(PIKI U DI KANDA)

*„Eei bi sölugu de, i sölugu mi.
Hii dee soni dë tuu, mi tei u bigi.
Di fai bi libi ku hii dee baaa u mi.
Di'i du ën da de, i du ën da mi.
Eei bi du ën da de, nööi du ën da mi.”*

2. „I bi da mi soni dim' bi dë ku hangi.
Hinwan son' dim' bi kë, i tja ko da mi.”
'U kë sabi na'un ten'u du
dee son' deei taki.'
Wë Könu o piki de be de sabi.

(Piki u di kanda)

3. „I bi pleiki ku de, i bi hoi'seei a de.
I bi wooko ku de, ta lobi de tee.”
Nöö di Könu o piki de
wan soni möön:
„Un tei di goonliba, nöö'un libiu teego.”

(Piki u di kanda)

27 *Dee womi mii u Gadu nango a feti* (Loomë 8:19)

1. Dee womi mii u Gaduo tii.

Deo dë ku Jesosi.

Abiti möön hiiu tuu o si
fa deo du gaan soni.

(PIKI U DI KANDA)

A liba'ala deo dë ta tii.

Jesosio dëa fesi.

Deo feti puu hii hogidu,
nöö hii sëmbëo ko fii.

2. Abiti möön dee lastiwan

dee dë a goonliba,

di Kõnuo kai de be de ko
u de tja fetilai.

(Piki u di kanda)

(ABA)

Deo ko a wan, deo feti tu
u puu dee hogiwan.

Deo puu fuka, woo libi fii
a hii di goonliba.

(Piki u di kanda)

1. Gadu ambëi ta si
kuma wan mati fii?
Ambë sa ko a di wosu fii?
Ambë i ta lobi?
Sëmbë di ta dinii,
nöö di ta biibii tu.
Sëmbë di lo' dee son' deei ta du,
di lo' di Wöutu fii.
2. Gadu ambëi ta si?
Ambë da mati fii?
Ambë sa begii? Ambë lobii?
Ambë sa' soni fii?
Sëmbë di ta heii në,
di na ta lëgëdë.
Sëmbë di ta hoi dee wëti fii,
dee sëmbë dëi lobi.
3. Eeu dë a wan fuka,
nööu konda son' fuu dai.
Möön woo ko zuntu, möön joo lobiu,
nöö joo ta heepiu tu.
U kë dë mati fii,
nöö u kë ta lobii.
Wao sa feni wan woto mati
di dë kumafai dë.

29

U ta tja di në u Jehovah

(Jesaaja 43:10-12)

1. Gadu Jehovah, i ta libiu teego.

Ju da lobi, nöö ia' makiti tu.

Ju leeu di tuu, nöö u sa' taa i köni.

Fëen mbeeu ta piizii ku son' di'i ta du.

Hiniwan dakau ta wai taau sa dinii.

Hiniwan ten'u ta konda soni fii.

(PIKI U DI KANDA)

*Ju dau di gaandi fuu sa dëi Kotoigi,
nöö u ta wai taau sa tja di në fii!*

2. U ta peleiki ta wooko makandi.

Lobi wë mbei taa u ko dë famii.

Wë u ta si taa wan gaandi u feni,

nöö u ta piizii u du wooko dai.

Hii sëmbë sabi taa u ta tja'i në fii.

Nööa dë wan gaandi di wa kë lasi.

(Piki u di kanda)

30 *Mi Mati, mi Gadu, mi Tata* (Hebelejën 6:10)

1. Libi ta taanga da mi.

Daka ta dë, sösö kää m'ta kää.
Ma te mi ko pakisei,
Jehovah Gadu dë.

(PIKI U DI KANDA)

Mi sabi taa a lobim'.

*Tem' ta mbei möiti, nöö a ta si.
Dee bunu soni dee m'du,
hii dee tuu seei a ta mēni.
Jehovah hën ta tjaa mi,
nöö hën ta heepim' tem' dëa fuka.
Hën dam' Mati, hën dam' Gadu,
hën dam' Tata.*

2. Sömēni jaa pasa kaa.

Mi ko ta gaandi, ma njönku möön.
Ma wan daka dë ta ko,
ka wao ta gaandi möön.

(Piki u di kanda)

1. Waka ku Gadu hinwan ten,
nöö lei taai lobi Gadu.
Na go disëen tu, bea ta leei soni,
nöö joo sa dë ku köni.
Eei du andi'i Wöutu fëen taki,
nöö nöiti joo disëen.
Mbei möiti fii dëa Gadu së,
nöö joo sa ta waka kuën.
2. Waka ku Gadu, nöö joo si
di limbo fasiu Gadu.
Te tesi ta ko, nööa sa hebi dai.
Ma nöiti Gaduo disai.
Ta mbei möiti fii ta du soni
kumafa Gadu kë.
Ta köni ku hii hogidu.
Waka ku di Gadu fuu.
3. Waka ku wai ku'i Gadu fuu,
nöö wai taa un dë mati.
Nöö ta dëen tangi ku wai a hati
u hii dee son' deea dai tu.
Wë waka hii juu ku'i Gadu fuu.
Ta wai, ta kanda dëen.
Nöö hii sëmbë o sabi taa
i ta libi da Gadu.

1. Wan ten bi dē ka u bi ta tjali,
di wa bi sabi di bunu pasi.
U ko ta wai u diu ko lei soni
u di Könuköndē Tii.

(PIKI U DI KANDA)

*Ko nama ku Gadu. Tei di pasi fēēn.
Hii ten ao ta heepii, nöö na go disēēn.
Go konda a hii sē taa sēmbēo ko fii,
nöö'i libi o suti te Jesusio tii.*

2. U dē makandi a Jehovah sē,
nööu ta peleiki da hii pei sēmbē.
Nöunöu u tuu musu du wan soni.
U musu goa Gadu sē.

(Piki u di kanda)

3. Saatan ta pooba u puuu a pasi.
Hii dee son' dē tuu Jehovah ta si,
nöö a ta heepiu, ta dau kaakiti.
Hēn abi hii makiti.

(Piki u di kanda)

33 *Tuwë dee hebi fii da Jehovah* (Psalöm 55)

1. Gadu, luku fa m'ta begii.
Ja musu go disa mi.
Luku fa mi dë ta tjali.
Heepi mi u ma ta fëëë.

(PIKI U DI KANDA)

Tuwë'i hebi fii da Gadu.

Biibi taa hën wanwan sa heepii.

Hii ten ao ta puui a fuka.

Nöiti Gaduo go disai.

2. Ee m'bi sa buwa goa liba,
nöiti mi bio toona ko.
Bookohedi ku sitaafu,
hii de tuu m'bio disa go.

(Piki u di kanda)

3. Te Jehovah ta ko heepiu,
wa ta fëëë na wan soni.
A ta tja dee hebi fuu dau.
Na wan fuu o ta tjali.

(Piki u di kanda)

34 *Mi o hoi miseei a dee wëti fii*

(Psalöm 26)

1. Konda da mi fa mi ta si soni.
Mi kë ko sabi tu, eem' dëa di pasi fii.
Tei luku mi, Taata andii ta si?
Unfa mi hati dë? Unfam' ta pakisei?

(PIKI U DI KANDA)

*Taata mi kë, mi kë ta hoi miseei
a hii dee wëti fii. Mi lo' di pasi fii.*

2. Ma ta nama ku dee hogiduma.
Ma ta waka ku de. Ma ta sindo ku de.
Mi ta begii, Jehovah tjubi mi.
Na mbei mi lasi go, mi lo' di pasi fii.

(Piki u di kanda)

3. Hiniwan ten mi dëa di wosu fii.
Ma ta kumutu dë, naandë mi kë ta dë.
Mio ta dinii, ta konda soni fii
a hii di goonliba, u hii sëmbë sa jei.

(Piki u di kanda)

*Ko sabi andi da
dee möön fanöudu soni*
(Filipi 1:10)

1. U tuu musu ko sabi andi da
dee möön fanöudu soni,
fuu du soni dio kai ku Jehovah,
dio mbei u feni wini!

(PIKI U DI KANDA)

*Buuse son' di Gadu buuse.
Gaduo wai tee,
u di'i lobi dee soni dia lobi.
Nöö joo ko si
and' dë fanöudu a'i ten aki!*

2. Di Könuköndë buka u Gadu
da'i möön fanöudu soni.
Boo mbei möiti fuu lei sëmbë soni,
u de sa feni libi.

(Piki u di kanda)

3. Teu du dee möön fanöudu soni,
nöö woo dë ku wai a hati.
Di kötöhati di Gadu ta da sëmbë
hën wë woo ta fii.

(Piki u di kanda)

1. U ta tjubi di hati fuu,
u diu lobi Gadu.
Jehovah ta si hii soni.
A sa' di hati fuu.
Di hati fuu ta kë ganjan'u.
A ta këu du zöndu.
Boo du andi Jehovah leeu,
fuu tjubi'i hati fuu.
2. Boo ta lesi di Wöutu fëen,
ta begiën faa heepiu.
Hiniwan dakau ta gafëen,
u hii dee son' dia du.
U diu lobi dee wëti fëen,
fëen mbei wao go disëen.
Alwasi a ta hebi dau,
woo dëa Jehovah së.
3. Soni di sa poi'i hati fuu,
wa ta kë pakisei.
Fëen mbei u ta mbei möiti tu
fuu dëa di tuutuu lei.
Jehovah seei ta heepiu tu.
A lo' dee sëmbë fëen.
Eea si taa hati fii limbo,
joo dë wan mati fëen.

1. Wë Jehovah ju mi lobi.
 Hii mi libi mio du soni dai.
 Ju mi kë ta diniu teego.
 Nöiti wan daka mio go disai.
 Hii dee wëti fii mi ta hoi tu.
 Mi ta du andii ta pikiu!

(PIKI U DI KANDA)

*Mi Tata, Jehovah Gadu,
 ju mi kë dini hii mi libi.*

2. Teu ta luku go a liba,
 nöö u ta si dee soni i mbei.
 Ju tö nöö wë fiti gafa.
 Hii sëmbë musu si fa i hei.
 Mi kë du dee soni di'i taki.
 Mi kë lei tu fa mi lobii.

(Piki u di kanda)

38 *A o mbei i ko taanga a di biibi* (1 Petuisi 5:10)

1. Wan soni mbei Jehovah haii tja ko nëen së.

A tjai ko a di leti pasi fëen.

U di a si fai dë, a si di hati fii,

a si taa i kë du dee son' deea kë.

I pikiën taa joo du andia taki.

Ao heepii, nöö hënseei o dë ta tiii.

(PIKI U DI KANDA)

A manda Jesosi ko

faa paka zöndu dai.

Ao heepii fii hoi dou,

nöö nöiti ao disai.

Dee bunu dee ao dai

o bigi möön fai bi kë.

Ao dai di köni fëen.

Ao mbei taa ja ta fëëë.

2. U di Jehovah kë u mi kui sa ko fii,

a manda Jesosi ko dëdë dau.

Ee'i lobi Mii fëen seei a bi sa manda ko,

nöö seiki ao heepii tei dëa fuka.

A ta si hii dee wooko deei ta du.

A ta si fai ta mbei hii möiti tu.

(Piki u di kanda)

39 *Du soni u Gadu mēni di nē fii* (Peleikima 7:1)

1. Hiniwan daka, u kē di libi fuu
kai ku Jehovah. Woo hoi hēn wēti tu.
Nöö te hēnseei o si fa u ta du soni,
nöö ao ta wai tee, ku'i libi fuu.
2. Wē di goonliba kē mbe'u ta du soni
fuu suku nēbai, fuu suku gudu tu.
Eeu lo' di goonliba, wao feni wini fēen.
Wao sa dē mati ku'i Gadu fuu.
3. U kē mbei möiti fuu libi bunu tu,
nöö Gaduo mēni dee soni deeu bi du.
Jehovah dēu futoou. Ao mēni di nē fuu.
Wē boo ta hoi dou. Be wa disa.

1. Ambë da'i gadu fii?

Un gadu i ta dini?

Di gadu di ta tii'i libi fii,

hën joo haika, nëën së joo dë.

Undiu dee së joo tei?

Jao sa dini tu gadu.

Go öndösuku, nööi wegi luku

fii saandii musu ta du.

2. Ambë da'i gadu fii?

Un gadu joo ta dini?

Wan kodo Gadu da'i tuutuu wan.

Dee wotowan da poipoi wan.

Na futoou dee tiima.

Dean sa tii di goonliba.

Eei dë ta suku wan bunu libi,

Jehova'i musu dini.

3. Ambë da'i gadu mi?

Jehovah mio ta dini.

Hën mio ta begi, hën mio gafa.

Mao go disëën na wan daka.

A puu mia zöndu maun.

Hën da'i Gadu di ta tjaam'.

Nëën së mio ta dë, mao goa woto së.

Jehovah mio ta dini.

41 *Ke Gadu o, haika di begi u mi*

(Psalöm 54)

1. Lobi Tata, mi ta kanda dai.
Hii mi libi mio dinii ku wai.
I wanwan tö fiti hii gafa.

(PIKI U DI KANDA)

Gadu Jehovah, ke haika mi.

2. Gaantangi fii, taai da mi libi.
I ta tjaa mi a di pasi fii.
Mi ta wai tee taa i dam' Tata.

(Piki u di kanda)

3. Mi kë libi kumafa i kë.
Heepi mi tu, um' hoi a ju së.
Dam' kaakiti u mi sa hoi dou.

(Piki u di kanda)

42 *Di begi u wan futuboi u Gadu* (Efeise 6:18)

1. Lobi Tata Jehovah mi Gadu,
be hii sēmbē ko si dee son' deei ta du.
I sa du hii soni di i kē.
Fēen mbeeu ta wakti di Könuköndē.
Hēn'u ta wakti, hēn'u kē si.
Libisēmbē o ko fii.
2. Hiniwan ten, Taata i ta dē kuu.
Nöö u ta si taai dau sōmēni bunu.
Ju da'i Sēmbē di dau di libi.
Ju sabi hii son', ju ta dau köni.
Fēen mbei woo ta dai tangi.
Söu ta lei tu taau lobii.
3. A goonliba, sēmbē dē ta du kuu,
mau ta mēni dee soni deei paamusiu.
I wē ta heepiu teu dēa fuka.
Teu ta tjali, nöö ju ta dau taanga.
Heepiu fuu sa du'i kē fii.
Dau di taanga fuu dinii.

1. Taata Jehovah, i ta haika begi.
U ta koa'i fesi u ko dai tangi.
Ju'u ta futoou, fëen mbei ju woo ta dini.
Ju da wan Gadu di saanfau ta fii.
Hii daka u ta mbei sömëni föutu,
ma tökuseei i taa' tjali'ati fuu.
Di Womi Mii fii hën'i manda ko heepiu.
Fëen mbei Taata u kë dai tangi tu.

2. U tei ën'u bigi taai lei taa i lobiu.
U ta dai tangi u di'i leeu di tuu.
Heepiu fuu ko fustan di Wöutu fii tu.
Ju nöou kë dini, i da'i Gadu fuu.
Di santa jeje fii hën i ta dau tu.
Hën ta dau taangau konda'i Wöutu fii.
U ta dai tangi u di'i dau wan gaandi,
nöo u kë dinii tu u diu lobii.

*Di begi u wan sëmbë
di ta fii bookosaka
(Psalöm 4:1)*

1. Jehovah mi kë haksii
fii sa haika'i begiu mi.
Dee fuka hia te nöö
mi ta fii taa a hebi.
Dee soni ta ko hia,
nöö de ta da mi tjali.
I dë wan Gadu di ta da
sëmbë kötöhati.

(PIKI U DI KANDA)

*Be mi hoi dou, puu mia fuka.
Nöö mao ta fëëë andio pasa.
Dam' kaakiti, nöö mao disa.
Jehova'i da di Gadu fuu.*

2. Di Wöutu fii ta heepi mi
ta da mi kaakiti.
Mi sabi taa i lobi mi,
nööi saanfa mi ta fii.
Mi kë fii dam' di biibi
di sa da mi taanga tu.
Di lobi di'i ta lobiu
bigi möön di hati fuu.

(Piki u di kanda)

45 *Dee soni dee mi ta pakisei
fundu a mi hati*
(Psalöm 19:14)

1. So juu mi ta dë ku fuka,
 nöö mi ta sindo pakisei.
So juu m'ta booko didia,
 nöö mi ta fii taa mi ko wei.
Jehovah Gadu, heepi mi.
 Mi kë fii da mi kaakiti.
Mi kë ta pakisei soni.
 Son' di ta kai ku'i pasi fii.
2. Dee son' dee dëa di Wöutu fii,
 dee soni dee i ta lobi,
mi këu de dëa mi pakisei.
 Bem' hoi dee soni deei ta leeu.
Dee son' deei ta konda da mi,
 hii juu mi ta tei deu bigi.
Fëen mbei de nöö m'ta kë mëni,
 u mi sa dë wan mati fii.

1. Jehovah Gadu, i du gaan soni dau,
nööu ta dai tangi u dee son' dë tuu.
U ta dai tangi u diu sa ta begii.
I seti soni fuu sa dëi mati.
2. U ta dai tangi u di Mii fii di'i dau.
A wini'i goonliba, nöö hën o tjaau.
Ju da di Gadu di ta puu a fuka.
Hii juu i ta leeu fai lobiu tjika.
3. U ta dai tangi u diu sa pleiki tu.
U wai taa u sa lei sëmbë di tuu.
Di Könuköndë o ko puu hogidu,
nöö hiiu tuu o libi u teego tu.

47 *Begi Jehovah hiniwan daka* (1 Tesalonika 5:17)

1. Begi Jehovah, a ta jei begi.
Disi da wan gudu di u feni.
Konda hii soni di dë ai hati.
Dë ku di mëni taa Gaduo heepii.
Begi Gadu hii daka.
2. Begi Jehovah, nöö dëen tangi tu.
Konda da Gadu tei du wan zöndu.
Hakisiën paadon'u dee soni deei du.
Hën wë ta dau libi, hën mbei u tuu.
Begi Gadu hii daka.
3. Begi Jehovah te soni mitii.
Hën wë dau Tata, ao dai kaakiti.
Nöö na fëekëtë taa ao sa tjubii.
I sa dë seiki taa ao ta heepii.
Begi Gadu hii daka.

48 *Waka ku Jehovah hiniwan daka* (Mika 6:8)

1. Boo ta waka ku Jehovah.
 Boo lei taa u lo' di Tata fuu.
 A lo' te ua' sakafasi.
 Hii juu a ta libi bunu kuu.
 Wë a seti soni dau tu
 fuu sa dë wan mati fëen.
 U bi taki taa woo diniën.
 Boo ta du soni di a kë.
2. Nöunöu Saatan hati boonu,
 u di'i dakau Gadu zuntu kaa.
 Sëmbë dë tu di kë tapau
 fu wa goa di njunjun goonliba.
 Ma Jehovah hën ta heepiu.
 Fëen mbei u kë dë nëen së.
 Nöö u teego u kë diniën.
 Na wan daka seei woo disëen.
3. Gadu ta heepiu ku'ën Wöutu,
 nöö a dau di santa jeje fëen.
 Di kemeente seei a dau tu,
 nööa ta haika hii dee begi fuu.
 Boo ta waka ku Jehovah,
 nöö ao heepiu fuu hoi dou.
 Saka'iseei a'i tii fëen basu.
 Boo ta waka ku'i Gadu fuu.

49 *U kë u Jehovah ta dë waiwai*

(Nöngö 27:11)

1. Jehovah u kë ta dinii,
nööu kë ta lei taa u lobii.
U kë fii wai ku'i libi fuu
tei si dee wooko deeu ta du.
2. Di saafu fii hën wë ta tjaau,
nöö hën ta seti soni dau.
Hën wë ta leeu dee soni fii.
U tuu ta tei'ën u bigi.
3. Wë dau di santa jeje fii,
sö taau sa hoi dee wëti fii.
Nöiti u kë fii ta tjali.
Hii juu u kë fii ta piizii.

1. Be mi wakaa'i pasi fii.
 Dam' kõni u mi sa si
 hii dee bunu deei ta du.
 Bem' ta gafai hii ten tu.
2. Dam' di santa jeje fii,
 um' sa hoi dee wëti fii.
 Hii dee gudu u mi tuu,
 mio ta tei u dinii tu.
3. Bem' sa du andii taki.
 Bem' dinii ku hiim' libi.
 Mi kë taa i musu wai
 ku dee soni deem' ta dai.

51 *Mi buta mi libi a Gadu maun!*

(Mateosi 16:24)

1. Jehovah hën mbei u ko dëa Jesosi së.

Fëen mbei u ko dë bakama fëen.

Gadu tjaau ko lei di tuu.

A ko dëa di hati fuu.

Nöö u ko ta biibi tu.

Hii soni dia taki woo du.

(PIKI U DI KANDA)

Mi wai taa mi butam' libi a Gadu maun.

Mio hoi hii dee wëti a buta dau.

2. U begi Jehovah hën u bi taki dëen

taau teego woo du soni dia kë.

Ma ku wai a hati tu,

u ta du andiu sa du.

U ta tja Jehovah në,

ta pleikiu di Könuköndë.

(Piki u di kanda)

*Keesitu sëmbë
ta buta de libi a Gadu maun*
(Hebelejën 10:7, 9)

1. Jehovah mbei di goonliba,
a mbei liba'ala tu.
A wooko taangau mbei soni.
U si dee son' deea du.
Di libi böö seei a dau tu.
Fëën mbei u dëa libi.
Hën nöö woo ta gafa hii daka,
hën töu musu ta dini.

2. Jesosi dopu a wata
faa du'andi Gadu kë.
A begi Gadu, pikiën taa:
'Hii ten mio ta dëa'i së.'
Di a kumutua di wata,
a toon di Salfuwan.
A buta hën libia Gadu maun,
ta piki Gadu buka.

3. U ko ai fesi Jehovah,
u gafa di në fii.
Woo du di son' di'i taki dau,
sö taa wa go lasi.
I dau di wan kodo Mii fii.
A paka zöndu dau.
Ai maun u ta buta hiiu libi,
u sa' taa i nöö sa tjaau.

1. Mamate,
döö ta limbo.
Woo go pleiki da sëmbë.
Kamian dungu,
nöö di tjuba ta ko.
Mi ta kë kandi, nööm' dë u mi
a wosu.

(PIKI U DU KANDA)

Ee mi hopo go seeka soni,

Gadu o heepi mi.

Ee mi begi ao dam' degi'ati,

u mi sa go.

Dee ëngëli o dëa mi bandja,

mi ku de o waka.

Jesosi hën bi da de'i wooko.

Boo waka go.

2. Boo mēni
hii dee soni,
dee ta ko abiti möön.
Teu ta mbei möiti,
nöö Jehovah ta si.
Wë a ta mēni di lobi fii,
diu mi tu.

(Piki u du kanda)

1. Wan pasi dë
 di mi kui sa dë seiki fëen.
 Di pasi dë
 da'i pasi teka feti'an dë.
 Jesosi seei
 bi taa u musu waka nëen.
 Di Bëibel seei
 ta konda son' u'i pasi dë.

(PIKI U DI KANDA)

U dëa di pasi di ta leeu di tuu.

Na mbei soni ko ganjan na wan fuu.

U dëa di pasi ka libi dë.

Wa musu go a na wan woto së.

2. Wan pasi dë
 di hiiu tuu musu waka nëen.
 Di pasi dë
 da'i pasi teka lobi dë.
 Jehovah seei
 bi mbe'u ko sabi soni fëen.
 Boo waka go,
 biga di son' dë Gadu kë.

(Piki u di kanda)

3. Wan pasi dë,
di Gadu kë fuu waka nëën.
Di pasi dë
o tjaau go teka libi dë.
Wotowan fëën an dë,
wë Gadu pikiu kaa.
Jehovah Gadu,
wë nööu ta dai tangi fëën.

(Piki u di kanda)

1. Boo ta pleikia hii dee köndë,
 ta piki hii sëmbë taa
 Jesosi toon Könu kaa,
 nöö ao puu de a fuka.
 A bi vinde Saatan puu a liba'ala
 koa goonliba.
 Wë abiti möön Didibi
 an'o sa ganjan sëmbë möön.

(PIKI U DI KANDA)

*Nöiti seei ja musu ta fëëë,
 hii fa soni sa mitii.
 Hii ten mio ta dë ta lukui,
 kuma wan tata ku'ën mii.*

2. Nöö ta mëni fai ta waka.
 Hogidu ko hia tee.
 Poipoi mati seei ko dë,
 nööi musu köni ku de.
 Sëmbëo ta ko feti kui,
 ma ja musu bookoi hedi.
 Eei ta hoi dee wëtiu mi,
 nöö mi saanfa mio ta tjubii.

(Piki u di kanda)

3. Na panta te hogi mitii,
hoi taa mio ta dē ai sē.
Mio wekii koa libi tu
eea ko dē taa i dēdē.
Fēen mbei mi ta pikii
taa ja musu fēēē libisēmbē.
Eei hoi dou tea di kaba,
nöö joo feni di paka fēen!

(Piki u di kanda)

56

Mbei Jehovah tii di libi fii

(Nöngö 3:1, 2)

1. Di lei u Gadu hën ta mbe'u feni wini.
Ma iseei musu ta kë haikëën.
Wë mbei hii möiti fii sa du andia taki,
nöö biibi dee soni dë tuu.

(PIKI U DI KANDA)

Tei Jehovah së.

Be a tii di libi fii.

Nöö joo si fa'i libio

waka bunu

te i tei Jehovah së.

2. Dee son' deei ta du a di dini u Gadu,
da son' dio mbeii feni gaan bunu.
Joo ta dë waiwai u di'i lobi Jehovah,
nöö joo libi u teego tu.

(Piki u di kanda)

3. Wë wao sa libi söndö'i lei u Jehovah.
U tuu abi'i tii fëën fanöudu.
Du andia taki, haikëën hiniwan daka.
Di libi o suti dai tee.

(Piki u di kanda)

1. U kë ko dë kuma di Gadu fuu.
A dë wan Gadu di lo' hii sëmbë.
Di libiu teego a kë da hiiu tuu,
nöö a ta kai hii sëmbëu ko nëën së.

(PIKI U DI KANDA)

*Hii pei sëmbëu ta suku,
na de fesiu ta luku.
Di bukau Gadu hën'u ta paaja sö.
U diu lobi hii sëmbë,
mbei woo pleiki ka de dë,
taa hii de tuu sa toon matiu Gadu.*

2. A hii kamian'u nango peleiki,
alwasi fa dee sëmbë ta libi.
Wë u kë sabi fa de hati dë,
biga di son' dë hën Jehovah kë.

(Piki u di kanda)

3. Teu go disa di hogi goonliba,
Jehovah seei o wai ku'i soni dë.
Di Wöutu fëen hën wë ta pikiu sö,
nöö woo kondëen da hii sëmbë di kë.

(Piki u di kanda)

1. Jesosi taa fuu paaja'i tuutuu lei.
Hēnseei bi pleiki da sēmbē,
alwasi fa di wei bi dē.
Lobi hēn mbei taa Jesosi bi go.
U mamate a bi nango
u te sapate.
A hii wosu u nango tu.
Di buka nöou ta paaja sö,
ta'abiti möön na wan pena o dē möön.

(PIKI U DI KANDA)

Goa dee köndē,

go suku sēmbē di lo' Gadu.

Boo go suku

dee sēmbē dee kë feni bunu.

Wa kë misi

na wan sēmbē.

2. Ten an dē tjika, boo go suku de.

Sömēni sēmbē sa dēdē,

ee wa mbei möitiu heepi de.

Lobi hēn mbei taa woo nango a de.

U kēu sēmbē di ta tjali,

feni kötö'ati.

A hii köndēu ta suku de,

a bausē seei tea libasē.

Ma teu feni wan sēmbē, nööu ta wai tee.

(Piki u di kanda)

59

Ko boo gafa di Gadu fuu

(Psalöm 146:2)

1. Ko boo kanda
da'i Gadu fuu.
Hën dau di libi, hën mbei u ta böö.
Hiniwan ten,
hën woo gafa,
wan Gadu di lobi hii sëmbë tuu.
Ko boo gafëen u dee son' dia ta du.
2. Ko boo kanda
da'i Gadu fuu.
Hën wë ta heepiu teu dë ku fuka.
Ku'ën kaakiti
u ta libi.
Fëen mbei a fiti taa u ta gafëen.
Boo konda soniu di makiti fëen.
3. Ko boo kanda
da'i Gadu fuu.
Wan ten ta ko ka ao puu hogidu.
U ta futoou
di Tata fuu.
Sömëni bunu di tii fëen o du.
Ko boo gafëen, boo ta dëen tangi tu!

Libi ta ko

(Ezekieli 3:17-19)

1. Gadu taa a ta ko
 ku di hati boonu fëën.
 Hën a taau musu go
 fuu go piki hii sëmbë.

(PIKI U DI KANDA)

*Libi ta ko da mi kui tuu.
 Wan kodo son' nööu sa du.
 U musu go a Gadu së.
 Wë boo go piki hii sëmbë,
 hii sëmbë.*

2. Boo go paaja wan buka
 di sëmbë musu jei.
 Ee wan sëmbë kë libi,
 a musu tei di lei.

(Piki u di kanda)

(ABA)

Di daka ta ko zuntu.
 Haika bei feni libi tu.
 Boo biinga paaja'i buka,
 be hii sëmbë ko jei di tuu.

(Piki u di kanda)

61 *Un dee Kotoigi, un tai hati!*

(Lukasi 16:16)

1. Boo tai degi'ati di kaba zuntu kaa.
Boo paaja di buka u dee son' dio pasa.
Didibi an kë taa u hoi dou.
Ma Jehovah dë kuu, nöö a ta heepiu.

(PIKI U DI KANDA)

*Kotoigi, un hoi go dou, wan musu disa!
Un wai taau sa wooko makandi kuu Tata!
Be hii sëmbë jei taa di Paladëisio ko,
nöö woo feni di libi u teego.*

2. Hii fa dee tiima o ta du hogi kuu,
ta dwengiu ta peetau fuu disa'i Gadu fuu,
ma nöiti woo disa Jehovah.
Wao ta fëëë, nöö nöiti woo bia baka.

(Piki u di kanda)

3. Hii sëu goonliba de ta poi Gadu në.
Dean kë jei soni u di Könuköndë fëën.
Jehovah në musu ko santa.
U musu konda soni fëën hii daka.

(Piki u di kanda)

Di njunjun kanda

(Psalöm 98)

1. Ko, ko boo kanda wan kandau gafa'i Gadu fuu.
 Wë a fiti gafa u hii dee son' dia du.
 Hën'u musu gafa hën ta tjubi dee sëmbë fëën.
 Te soni'an go bunu,
 nöö hënseei ta seekëën.

*(PIKI U DI KANDA)**Boo kanda**di njunjun kanda dëën!**Boo kanda**wan kanda u gafëën!*

2. Boo hopo kanda, Jehovah da di Könu fuu.
 Boo gafa di në fëën, sëmëni sonia du.
 Ko makandi kuu, ko boo gafa di Gadu fuu.
 Böö tutu boo kanda.
 Seeka fii kanda tu.

(Piki u di kanda)

3. Gadu mbei soni. Hën mbei dee pau, hën mbei di ze.
 Hii de tuu ta gafëën, de ta waiti dëën tee.
 Luku hii dee kuun, luku dee fou seei ta kanda.
 Luku fa de waiti.
 Gadu de ta gafa.

(Piki u di kanda)

1. Peipei soni dëa mundu
 di sëmbë ta kai gadu.
 Ma Jehovah Gadu
 hën da'i tuutuu wan.
 Hën ta si andio pasa,
 woto gadu an sa si.
 Dee gadu dë an sa du soni,
 teu maaka de ku'i Gadu fuu.

(PIKI U DI KANDA)

*U ta hei Jehovah në.
 U da dee Kotoigi fëen.
 Andi a taki hën a ta du,
 nöö sö a ta pasa tu.*

2. U ta paaja wan buka
 da hii sëmbëa goonliba
 taa Jehovah Gadu
 hën da'i Möön Heiwan.
 Nöö te de ko sabi kaa,
 nöö Jehovah deo gafa.
 Deo ta konda fa Gadu bigi.
 Deo hopo taanpu, deo kanda.

(Piki u di kanda)

3. Teu ta hei Jehovah në,
teu ta paaja'i buka fëën,
sëmbë ta ko sabi
fa Jehovah dë.
Dee hogi sëmbë ta du,
Gadu buuse hii de tuu.
Ma ee de tooka'i libi u de,
Gadu o da de paadon tu.

(Piki u di kanda)

64 *Boo biinga ku di wooko u Gadu* (Mateosi 13:1-23)

1. Di wooko u Gadu goa fesi.
Soni hia diu musu du.
Wanlö sëmbë dë fuu go heepi,
u de sa ko sa' Gadu tu.
A Jesosi bakau ta waka,
hën leeu fa di wooko ta du.
Hiniwan daka u ta wai sö tee
taau sa wooko da'i Gadu fuu.
2. U nango peleiki da sëmbë.
U kë lei de taau lobi de.
U ta lei de soni u Bëibel,
biga di kaba zuntu tee.
Di wooko ta mbei u ta wai tu
teu ta si fa'a nangoa fesi.
Boo du soni kumafa Gadu kë,
nöö hënseei o dau kaakiti.

65 *Boo mbei möiti fuu go a fesi!*

(Hebelejën 6:1)

1. Boo mbei möiti go dou fuu sa goa fesi.
Be hii sëmbë ko si taa Jehova'u ta dini.
U kë heepi sëmbë u feni libi.
Fëën mbei u ta peleiki.
Jesosi seei bi du'i soni dë.
A bi hai sëmbë koa Gadu së.
Wë Jehovah o dau di kaakiti fëën
fuu sa pleiki da sëmbë.
2. Boo mbei möiti, boo lei tu taa wa ta fëëë.
Wë di bunu buka u ta konda da sëmbë.
Boo ta gafa Jehovah, di Gadu fuu.
Söu ta lei sëmbë di tuu.
Wë so juu felantima ta dë,
ma peleiki go dou, nöö na fëëë.
Konda soni u Gadu Könuköndë.
Hën di son' dë Gadu kë.

3. Boo mbei möiti, biga di ten sati kaa.
Boo go pleiki da sëmbë
a hii di goonliba.
Teu ta heepi sëmbë, ta puu dea fuka,
hii daka woo ta piizii.
Wë di santa jejeo ta dë kuu
teu ta konda soni u Gadu.
Teu ta heepi sëmbëu de ko sa' di tuu,
nöö deseeri o sa ko fii.

66 *Paaja di bunu buka da sëmbë*

(Akoalimbo 14:6, 7)

1. Wë longi ten Jehovah seti soni kaa.

A mbei di Womi Mii fëen ko a goonliba.

Di Wöutu fëen hën tja soni koa limbo dau.

Jesosi toon Könu, ao puu a zöndu maun.

Dee soni'aki ta leeu taa Gadu lobiu tuu.

Di Könuköndë fëen o puu

hii dee fuka fuu.

Abiti möön Jesusio tii di goonliba.

Ao dë ta tii makandi ku dee salfuwan.

2. Wë longi ten a fesi Gadu bi konda

ta'a'i ten aki sëmbë bio paaja wan buka.

Wan buka di u tuu ta konda soni fëen.

Dee ëngëli ta heepiu paaja'i buka dë.

U tuu abi di wookou hei Jehovah në.

U wai ta'a dau di wooko,

fëen mbei woo ta gafëen.

A teeu kuma Kotoigi fëen, nöö sö woo dë.

Di bunu buka woo tapaja a hii së.

1. Boo tja di buka u Gadu.

Wan buka di dë da hii sëmbë tuu.

Mbei möiti fii paaja'i buka dë.

Be hii sëmbë ko sabi soni fëen.

(PIKI U DI KANDA)

Wë go kondëen!

Paaja'i buka da sëmbë.

Go kondëen!

Be de koa Jehovah së.

Go kondëen!

Be de sabi Gadu në.

Go kondëen

a hii köndë!

2. Sëmbë o taki hogi fuu.

Deo kë tapau fu wa dini Gadu.

Ma eei ta mbei möiti ta begi,

Jehovah seei o dai di kaakiti.

(Piki u di kanda)

3. U nango tea sëmbë pisi.

U ta lei de fa deseei sa ko fii.

De ta ko sabi fa Gadu dë.

A sō wan fasi de sa hei'ën në.

(Piki u di kanda)

1. Jesosi bi ta du wan wooko,
nööa kaau fuu du'i wooko dë tu.
A paamusiu taa ao ta heepiu.
A leeu fa di wooko ta du.
A taau musu pleiki be sëmbë jei
di bukau di Könuköndë.
Te'i Wöutu u Gadu dou sëmbë hati,
nöö ao göö leti kuma wan sii.

2. Eei kë taa di wooko du bunu,
du hii soni di i sa du.
Mbei möiti u lei sëmbë soni
u de sa wakaa di pasi.
Te tesi ta ko a'i libi u de,
nöö heepi de u de go dou.
Joo wai te i si taa de nangoa fesi
u di'i Wöutu bi dou de hati.

*Boo ta paaja
di Könuköndë buka nöömö!*
(2 Timoteo 4:5)

1. Boo paaja di buka u Gadu
da sëmbë a hii köndë.
Boo heepi sëmbë, da de taanga
u du andi Gadu kë.
U wai taau sa wooko ku Gadu.
Fëen mbei woo konda'i buka fëen.
Mbei möiti go dou ku di wooko,
be sëmbë ko sa' Gadu në.

(PIKI U DI KANDA)

Boo ta paaja

Könuköndë buka a hii goonliba.

*Boo ta hoi dou a Jehovah së,
nöö wa musu disa.*

2. U tuu ta peleiki makandi
ta paaja di tuutuu lei.
Eeu njönku nasö u ko gaandi,
u tuu kë sëmbë ko jei
dee bunu di Gadu o tja ko.
Di tii fëen o mbei u ko fii.
Jehovah o heepiu fuu pleiki,
alwasi di ten ko hogi!

(Piki u di kanda)

70 *Suku sëmbë di kë sabi soni u Gadu* (Mateosi 10:11-15)

1. U ta du di wooko di Jesosi du.

A leeu fa di wooko ta du:

'Ta suku dee sëmbë di o kë haika,
söseei di o kë tei di buka.

Da odi, nöö fan a wan suti fasi.

Konda soni dio dou de hati.

Ma ee dean kë jei di buka di'i tja ko,
lei taai lobi de, nööi waka go.'

2. Ee wan sëmbë tei dee soni i taki,
a haika di Miiu Gadu tu.

Dee sëmbë di kë feni'i tuutuu libi
o ko toon dinima u Gadu.

Na booko i hedi ku and' joo taki,
wë Jehovah o heepii fii fan.

Te u ta mbei möitiu fan suti ku de,
deseei o ko toon Gadu mati.

1. U da sëmbëu Jehovah
 di ta feti dëën.
 Jesosi hën dau Könu,
 Saatan an'o sa winiu.
 U ta du di wooko fuu
 di Jehovah dau.
 Wa ta fëëë dee sëmbë
 dee ta kë tapau.

(PIKI U DI KANDA)

*U da sëmbëu Jehovah
 di ta feti dëën.*

*U ta paaja'i buka:
 „Gadu bigi tii.”*

2. U ta dini Jehovah.
 U ta wooko dëën.
 Nöö u ta suku sëmbë
 u de sa tei'ën së.
 U ta lei de soni tu.
 U ta da de lai.
 Te de ko a zali,
 de ta dë ku wai.

(Piki u di kanda)

3. U da sēmbēu Jehovah
di ta feti dēēn.
Jesosi hēn ta heepiu
fuu sa dēa Gadu sē.
Wa ta disa'i Gadu fuu,
u ta feti dēēn.
Hii ten woo ta hoi dou,
u di wa ta fēēē.

(Piki u di kanda)

72 *Paaja di buka u di Könuköndë* (Tjabukama 20:20, 21)

1. Di wa bi saandi Gadu kë,
di ten dë wa bi tei hën së,
hën Jehovah dau wan maun.
Di Könuköndë lei a dau,
hën wojo fuu ko limbo tu.
Nöö u ko saandiu musu du
fuu sa hei Jehovah në,
ta konda soni fëen da hii sëmbë.
U ta peleiki da sëmbë
a de pisi, hii ka de dë.
Boo heepi de, be de seei si
fa'i tuutuu lei ta mbe'u ko fii.
Nöou kë taa hii goonliba jei
taa'i sëu Jehova'u musu tei.
Boo du'i wooko di fika,
u te Jehovah taki ta'a tjika.

Da u degihati (Tjabukama 4:29)

1. Teu ta pleiki u di nē fii,
ku di Könuköndē tii,
sēmbē sai dē an ta kē sō.
Sösō sen de kēu ta fii.
Ka fuu fēēē libisēmbē,
dee fan fii nöö u musu tei.
Ke Jehovah dau santa jeje.
Söu ta begii, gaantangi jei.

(PIKI U DI KANDA)

*Dau degi'ati teu ta pleiki.
Heepiu sö taa wa ta fēēē.
Dau di köni ku di taanga,
fuu go piki hii sēmbē.
Amagedon ko möön zuntu.
Teu di gaan daka dē ko tu,
dau degi'ati fuu sa pleiki.
Söu ta begii.*

2. Ma so daka u ta fëëë seei,
nöö i sabi'i soni dë.
I paamusi taa joo dë kuu.
U ta biibi'i soni dë.
Buta mënia dee hogi,
felantima fuu ta kë du.
Da u tuu degi'ati u pleiki,
teu ta lei sëmbë soni fii.

(Piki u di kanda)

74 *Ko boo kanda di Könuköndë kanda!*

(Psalöm 98:1)

1. Di kanda'aki ta da hiiu tuu degi'ati.
U ta gafa di Möön Hei Gadu kuën.
Ee u hoi dou, nööu sabi taa woo wini.
Ko boo kanda'i Könuköndë kanda.

(PIKI U DI KANDA)

Ko boo kanda da u Tata.

Di Mii fëen seei toon Könu kaa.

Ko lei di kanda u di Könuköndë.

Ko boo kanda, boo gafa Gadu në.

2. Di kanda'aki ta mbei sëmbë ko sabi
di Könuköndë ku di Könu fëen.
Di Könu hën da Keesitu u Masa.
Dee salfuwan o tii makandi kuën.

(Piki u di kanda)

3. Wë sëmbë dë di kë kanda makandi,
nöö de ta kai woto sëmbë u ko.
De dë sëmbë di abi sakafasi,
nöö de ta wai u kanda di kanda.

(Piki u di kanda)

1. Sömëni sëmbë feni taa
 Jehovah ta mbeeu tja pena.
 la' wotowan taa Gadu'an dë.
 Nöö sö wë de ta poi'en në.
 Ambë o limbo Gadu në?
 Ambëo go konda soni fëen?

(PIKI U DI KANDA 1)

*Manda mi be mi go, mio go!
 Mio du hii son' di'i këu mi du.
 Mio wai ee mi sa du soni dai.
 Be mi go, manda mi go!*

2. So sëmbë an ta biibi taa
 Jehovah o puu hii fuka.
 Sou de ta dini pobiki.
 Sou de kë taa gaan lanti tii.
 Ambëo go piki hii de tuu,
 be de disa dee hogidu?

(PIKI U DI KANDA 2)

Manda mi be mi go, mio go!

Mi kë go konda soni fii.

Mio wai ee mi sa du soni dai.

Be mi go, manda mi go!

3. Sëmbë dë a di goonliba
ta tja sitaafu ku pena.
Sëmbë wë ta pena de sö.
De ta suku u feni böö.
Ambëo tja de koa Gadu së?
Ambëo go lei de soni fëën?

(PIKI U DI KANDA 3)

Manda mi be mi go, mio go!

Mi kë go konda soni fii.

Mio wai ee mi sa du soni dai.

Be mi go, manda mi go!

1. Konda unfai ta fii
 tei ta lei sëmbë soni,
 tei bi mbei hii möiti tu
 fii du'andi Gadu kë.
 Eei sabi taai bi go,
 fii go paaja'i buka fëen,
 nöö na bookoi hedi möön.
 A sa' dee sëmbë fëen.

(PIKI U DI KANDA)

*Wë u ta wai, te u ta si
 taa u sa gafa'i Gadu fuu.
 Hiniwan dakau ta piizii
 taa u sa pleiki tu.*

2. Konda unfai ta fii
 tei bi miti wan sëmbë,
 nööa bi kë fii toona ko
 di woto daka fëen.
 Na hii sëmbë ta kë
 jei di buka diu ta tja.
 Ma Jehovah ta wai kuu,
 fëen mbeii si wao tapa.

(Piki u di kanda)

3. Konda unfai ta fii
taa Jehovah seei ta si
hii dee möiti dee ta mbei,
nöö de ta bigi dëën.
Te u ta peleiki,
wa ta fëëë na wan sëmbë.
Nööu ta paaja'i buka tu
da hii sëmbë di kë.

(Piki u di kanda)

77 *Limbo dë a wan dungu goonliba* (2 Kolenti 4:6)

1. Goonliba dëa dungu tide,
ma u ta si limbo.
Didia hën wë u ta si.
A dëa pasi ta ko.

(PIKI U DI KANDA)

*Limbo a di dungu,
sö di boskopu fuu dë,
di sëmbë musu jei.
Bunu hën dë ta ko.
A ta tja kötö'ati ko
da hii sëmbë.*

2. Boo goa de, boo go piki de.
Di ten ko sati kaa.
Boo begi da hii sëmbë tuu
be de dou di'amanjan.

(Piki u di kanda)

78 *'Lei sēmbē soni u Gadu Wöutu'* (Tjabukama 18:11)

1. Te u ta lei sēmbē soni,
nöö u ta dē ku wai.
Di Wöutuu Gadu hēn'u ta tja,
hii sēmbē u ta kai.
Jesosi bi ta lei sēmbē
dee soni Gadu kē.
Useei kē heepi hii pei sēmbēu
de ko a Gadu sē.
2. Jehovah hēn'u ta djeesi tu
a soni diu ta du.
Di libi fuu ta lei sēmbē
ee u ta lei di tuu.
Boo lei sonia di Wöutu fēen,
ta suku soni nēen.
Boo lei sēmbē taa'i libi fuu seei
ta kai ku'i Gadu fuu.
3. Jehovah dau di Wöutu fēen,
a leeu andiu sa du.
Teu begi, nöö ao dau köni
fuu heepi sēmbē tu.
U lo' dee soni deeu ta lei.
U lo' di Gadu fuu.
Boo lei sēmbē soni, u deseai
sa ko dē leima tu!

1. U ta wai, u diu ta lei sëmbë
hii dee son' di Gadu kë.
U ta si fa a ta tja dea maun,
te de tei di buka fëen.

(PIKI U DI KANDA)

Jehovah, jei di begi fuu.

U kë fii tjubi hii de tuu.

Heepi deu taanpu gingin tu. Be de hoi dou.

A'i në u Jesosiu begii.

2. Wa bi wei u begi da de tu,
biga son' ta miti de.
U bi tei ten fuu sa lei de tu,
nöö sö wëu bi taanga de.

(Piki u di kanda)

3. Be de tuu hoi a Jehovah së.
Be de haika Jesosi.
U sa' taa te hii de tuu hoi dou,
libiu teego deo feni.

(Piki u di kanda)

*Dini Jehovah,
nöö joo feni bunu*
(Psalöm 34:8)

1. U lobi di wookou Gadu,
nöö hiiu tuu ta tei ën'u bigi.
U tei hiiu libi fuu du'i wooko fëën.
U wai ku di gaandiu feni.

(PIKI U DI KANDA)

*Dini Jehovah, du soni dëën,
nöö joo si fa a dë tuu.
Woo feni wini, teu ta gafëën.
Boo du hii son' diu sa du.*

2. Teu dëa hii-ten diniwooko,
u ta feni hia bunu,
u diu ta futoou taa Gaduo heepiu
ku dee soni ua' fanöudu.

(Piki u di kanda)

1. Fai si mamate dou, ufö sonu jabi,
u ta begi, ta seekau
go paaja di bunu buka.

U ta wai teu nango, bigau lo' dee sëmbë.
Wa ta wei ee sëmbë an kë
haika di bukau ta tja.

(PIKI U DI KANDA)

Wë di libi'akiu kë.

Wë Jehovah dau ën.

Hii dee soni dia haksiu woo du.

Wa ta wei u pleiki.

Tjuba seei an'o tapau.

Ku di wooko'aki Gadu ta si, taau lobiën.

2. Fai si sapate dou, te di sonu nango,
u ta wai taa Jehovah
bi tjaau pasa hii di daka.

U da hiiu kaakiti, u diu lo' di wooko.

Nöö Jehova'u ta da tangiu

di a ta tjaau hii daka.

(Piki u di kanda)

*Libi fuu musu dë
kuma wan faja limbo*
(Mateosi 5:16)

1. A hii sëu goonliba
 sëmbë dëa dungu,
 di bio kë ko sabi
 soniu Gadu tu.
Di Buku u Gadu
 hën ta leeu di tuu.
Boo tuwë di limbo fëën
 da hii sëmbë tuu.
2. Be di Wöutuu Gadu
 dou sëmbë hati.
Be a puu dea dungu,
 u de sa ko fii.
Nöö deo sa ta waka
 a di pasi fëën.
Deseei o ko sabi tu
 andi Gadu kë.
3. Teu ta libi bunu,
 wotowan ta si.
U kë tuwë limbo
 kuma Jesosi.
Boo ta mbei hii möiti
 fuu ta du soni
di ta kai ku'i Gadu fuu,
 di u ta dini.

1. U tuu nangoa sëmbë pisi
go naki sëmbë döö.
Di bunu buka hën'u ta tja.
Hën wëu ta paaja sö.
Di Könuköndë seti tu.
Boo konda soni fëen.
Kumafa Jesosi taki,
boo pleiki da sëmbë.
2. U tuu nangoa sëmbë pisi
u hei Jehovah në.
Söseei u nango kai sëmbë
u koa Jehovah së.
Unfa deo kai di nëu Gadu
ee wa bi go kondëen?
Fëen mbeeu nango a hii sëmbë
go konda soni fëen.
3. Boo go peleiki da sëmbë
di ta suku di tuu.
Ma ee so sëmbë an kë jei,
woo gafa'i Gadu fuu.
Jehovah mbei sëmbë u de
sa taki and' de kë.
Fëen mbei boo suku sëmbë di
kë koa Jehovah së.

Go heepi

(Mateosi 9:37, 38)

1. Gadu sabi andiu sa du,
nöö a ta leeu fau sa piizii.
Wë a ta dau sömëni lai.
Eeu tei de tuu, nöö woo ta wai.

(PIKI U DI KANDA)

*Go heepi, son' dëu du
da di Gadu fuu.*

*I sa lei wan töngö, fii heepi
ka'a dë fanöudu.*

2. Wë u sa go a wan köndë.
U kë heepi ka sëmbë dë.
Nöö eeu bio go, useei o si
taa di wooko nangoa fesi.

(Piki u di kanda)

3. Wë wooko dë ka'i ta dë tu.
Suku wan son' di i sa du.
Na goa baka, na go sindo.
Gadu buka u ta tja go.

(Piki u di kanda)

1. Gadu hën kaau ko fuu ko lei soni
a'i Wöutu fëen, di ta dau libi.
Hën leeu di pasi, hën ta leeu di tuu.
Fëen mbei u ko tide, fuu ko gafa Gadu.
2. Teu ko makandi a di zali fuu,
dee baaa ku sisa ta wai kuu tu.
Woto sëmbë ta ko makandi kuu.
Da de wan suti ko, be de fii bunu tu.
3. Gadu ta si fa sëmbë hati dë,
nööa ta hai sëmbë u ko nëen së.
Jesosi heepi du di wooko dë.
Boo wai ku hii sëmbë di ta koa Gadu së.

1. U ta lei soniu di Gadu fuu Jehovah.
A ta leeu soni di bunu dau tuu.
Dee lei u Gadu o mbei u libi.
Eei ta haikään, nöö joo libiu teego.
2. Gadu ta leeu fuu ko sabi andi bunu.
Fään mbei na misi dee komakandi.
Di santa jeje, dee baaa ku sisa
ta dau di taanga fuu haika Gadu.
3. U ta piizii teu ta kanda da Jehovah!
U ta lei soni di ta dau taanga!
Boo ko makandi fuu sa lei soni!
Boo ko makandi kuu baaa kuu sisa!

87 *Dee komakandi ta da u taanga*

(Hebelejën 10:24, 25)

1. Sömëni sëmbë an sa' soniu Gadu.
Dean sabi andi dë ta ko.
U sabi taa di goonliba ko hogi,
a Gadu së u musu go.
U ta lei soni a dee komakandi.
Dee son' dë ta dau kaakiti.
U ta lei taau musu ta libi bunu.
Degi'ati u ta feni tu.
Teu ta ko makandi u ta dë ku wai,
u ta si dee baaa ku sisa.
Jehovah ta tiuu, a ta tjaau ko a wan
a hii së u di goonliba.
2. U ta lei soni a dee könklësi fuu,
Jehovah hën ta söluguu.
Dee lei fëen an dë da wan kodo sëmbë,
de bunu da hii sëmbë tuu.
A Bëibel u ta lesi soniu Gadu
ku dee woto dinima fëen.
U ta lesi soniu taanga'i biibi fuu.
U ta du andi Gadu kë.
Nöunöu u ta wakti di ten di ta ko
ka woo ta libi makandi,
ka na wan fuka, ku na wan pen o dë,
nöö Gaduo dau teego libi.

1. Jehovah u Gadu, i kaau ko aki.
 U wai taa i tjaau ko makandi.
 I kë leeu soni, i kë fuu ko köni.
 Di Wöutu fii ta leeu di pasi.

(PIKI U DI KANDA)

*Lei mi soni, da mi di köni fii.
 Mi kë di Wöutu fii dëa mi hati.
 Be mi ko lobi hii dee wëti fii.
 Mi kë ta waka a di pasi fii.*

2. Jehovah i köni möön hii sëmbë tuu.
 Di Wöutu fii hën ta dau libi.
 A ta bigi dau teu ta lei soni fii.
 Dee son' deei ta leeu an ta gaandi.

(Piki u di kanda)

(Lukasi 11:28)

1. Jesosi leeu soni ku Gadu Wöutu,
söseei a leeu fa u sa dë ku wai.
Eei libi ku hii dee son' dia ta leeu tu,
joo si dee bunu dee Gadu kë dai.

*(PIKI U DI KANDA)**Bunu hën Gadu kë dai.**Tei haika, nöö ao pakai.**Tei piki'ën buka, nöö joo dë ku wai.**Bunu hën Gadu kë dai.*

2. Eeu ta libi ku di Wöutu u Gadu,
ao ta dau taanga te fuka mitiu.
Di biibi fuu o dë kuma sitonu,
nöö woo sa du andi Jesosi du.

(Piki u di kanda)

3. Te u ta du andi'i Gadu fuu taki,
hënseei o mbe'u feni teego libi.
Woo dë kuma wan pau di ta da njanjan
di sëmbë paandi a bandja wata.

(Piki u di kanda)

1. Mi lobi teu ta ko makandi,
nööu ta gafa di Gadu fuu.
Hii fa di libi ta ko hebi,
mao go nama ku hogidu.
Di lobi u dee baaa ku sisa
ta da mi taangau mi go dou.
Te de ta si mia komakandi,
de ta waka ko fan ku mi.

2. So juu mi ta dë ku wan fuka,
mi ta fii bookosaka tu.
Dee wöutu u dee baaa ku sisa
ta lei mi andim' musu du.
Mi ta si fa Jehovah heepim'.
Mi ta si fa a lobi mi!
Wë sö u ta da'useei di taanga,
nöö söu ta heepi wotowan.

3. U si taa'i dakau Gadu zuntu,
fëen mbe'u kë taanga'i biibi fuu.
Hii ten'u musu ta ko makandi,
nöö woo sa feni di libi.
Hii dee dinima u Jehovah
ta libi bunu ku deseei.
U dë ta wakiti di daka
ka libisëmbë o ko fii.

1. Tide u ko makandi.

Taata u tuu kë dai tangi
u dee sonii ta du, fai lobiu,
u tei ën'u bigi!

Tide u tuu dë ku wai.

Wan wosu dë diu bi kë dai.
Wë ao ta tja'i në fii, nöö u kë
fii tei'ën ku wai.

(PIKI U DI KANDA)

*Jehovah ju wë dau di gaandi
fuu bi sa mbei wan wosu dai.*

*U kë gafai ku'i wooko diu du. Ju wanwan tö
woo ta dini, ta dë ku wai.*

2. Hii sëmbë dë ta luku

fa u kaba di wooko fuu!

Wë a bi suti tee fau bi dë
ku dee mati fuu!

U kaba mbei di wosu.

Di santa jeje bi dë kuu.

Jehovah ee na ju, wa bio sa
du di wooko fuu!

(Piki u di kanda)

1. Jehovah tideu ko makandi
 fuu dai wan wosu di u mbei.
 Di wosu aki o tja'i në fii,
 nöö'i soni aki bigi tee.
 Alwasi andi u bio kë dai,
 de tuu da soni di i dau.
 Woo ta du soni fuu sa dinii
 ku'i köni ku'i kaakiti fuu.

(PIKI U DI KANDA)

*U mbei wan wosu diu kë dai.
 Wan wosu dio tja'i në fii.
 U mbei wan wosu fuu gafai.
 U ta begii fii tei'en.*

2. U kë du soni fuu sa gafai.
 Fëen mbe'u mbei di wosu'aki dai.
 Nëen dendu sëmbë o ta ko tu,
 nöö deo ta ko dinii ku wai.
 Aki woo ta hoi komakandi.
 Woo dë ku dee baaa ku sisa.
 Aki woo ta feni kötö'ati,
 eea dë taau bi dë ku fuka.

(Piki u di kanda)

93 *Be soni waka bunu te u ko makandi*

(Hebelejën 10:24, 25)

1. U Tata, Jehovah Gadu,
u kë begii fii heepiu.
Tide hiiu tuu ko makandi,
be di jeje fii dë kuu.
2. U këi heepiu fuu sa dinii.
Wa kë dëa'u seei leiki möön.
U kë saanfau musu pleiki.
Fëen mbe'u ko makandi sö.
3. Taata, be u feni wini
te hiiu tuu ko makandi.
Be dee soni dee woo taki
lei taau kë hei di në fii.

94 *U wai taa i da u di Wöutu fii* (Filipi 2:16)

1. U Tata Jehovah, u kë dai tangi.
U wai taa i bi kë dau di Wöutu fii!
I mbei sëmbë sikifiën
fuu ko sa' soni fii.
Dee köni dee saidë ta tookau libi.
2. Dee son' dee u lobi, ku dee u ta kë,
sa mbei taa u ta du soniu dai poi në.
Mau wai taa i ta heepiu,
i dau dee wëti fii.
U ta feni wini a di Wöutu fii.
3. Dee womi dee skifi di Wöutu fii dau,
deseei bi ta fii kumafau ta fii tu.
Di biibiu de bi taanga,
nööu kë djeesi de tu.
Taatau kë dai tangi, u di Wöutu fii!

1. Dee tjabukama bi ta haksi deseei
ambë bio dë di Mësiasi.
Di sëmbë dio puu libisëmbëa fuka,
dio leeu fau sa waka di pasi.
Di ten dou awaa, kau ko sabi soni.
U saambë da'i Miiu Gadu kaa.
Nöunöu u ta fustan taa hën dë ta tii,
nöo ao mbei libisëmbë ko fii.

(PIKI U DI KANDA)

Awaa u ko fustan dee soni.

Dee soni dee Gadu kë leeu.

Awaa wojo fuu ta ko limbo.

Jehovah ta puuu a dungu.

2. Di saafu köni, a ta leeu soni tu.
Dee sëmbë dee Jesosi buta.
Teu ta luku go a dee jaa dee pasa,
wanlö soni dë diu ko sabi.
Dee son' deeu ta lei, de ta dau köni tu.
U si taa u nangoa fesi.
Jehovah ta tiu, nööa ta mbe'u sabi taa
na wan soni o mbe'u lasi go.

(Piki u di kanda)

96 *Di Buku u Gadu da wan gaan gudu*

(Nöngö 2:1)

1. Wan buku dë ka soniu Gadu skifi.
Di buku dë ta mbei sëmbë piizii.
A ta dai köni, a ta mbeii si limbo.
Eei dëa katibo, a ta mbeii ko fii.
Di buku dë, hën de ta kai di Bëibel.
Gadu mbei sëmbë skifiën da mi kui.
Dee sëmbë dë bi lobi Gadu tuutuu.
Di santa jeje hën bi heepi de.
2. De skifi fa Jehovah mbei goonliba.
De taki fa a abi makiti,
söseei fa libisëmbë du wan zöndu.
Fëen mbei di Paladëisi an dë möön.
De taki fa wan basia u Gadu,
bi feni taa Gadu an musu tii.
Di soni dë tja hogi ko da hiiu tuu.
Abiti möön Jehova'o mbe'u ko fii.

3. U dëa wan ten ka u musu ta piizii.
Di Womi Mii u Gadu seei ta tii.
Fëen mbei woo pleiki u di Könuköndë.
Boo go paaja'i buka da hii sëmbë.
Sömëni soni dë a Gadu Wöutu,
di ta lei taa libisëmbë o fii.
Hiniwan daka u musu ta lesiën.
Nöö mi kui o sa feni wini fëen.

97 *Di Wöutu u Gadu o mbei u feni libi*

(Mateosi 4:4)

1. Gadu kë taa mi
kui ta wai,
nööa këi feni bunu.
Lei soni a di Wöutu fëen
fii sa feni gudu.
Ja musu djombo daka seei, hën'i musu ta lesi.

(PIKI U DI KANDA)

*Eeu ta lesi di Wöutu fëen,
nöö woo feni libi.
Lei soni a di Wöutu fëen,
nöö joo feni libi.*

2. Teu ta lesi dee woto seei,
nöö useei ta ko si,
sëmbë di bi ta biibi dee
son' dee Gadu taki.
Wë useei sa ta djeesi de.
Hën Jehovah bi kë.

(Piki u di kanda)

3. Du dee son' di Jehovah kë.

Lesi di wöutu fëën.

Nöö joo sa feni heepi tu
da hii dee fuka fii.

Tei ta du son' a'i fasi dë,
nöö Jehovah o tiii.

(Piki u di kanda)

1. Gadu ta tuwë limbo dau,
teu ta lesi'i Wöutu fëen.
A sa tjaau pasa hii fuka,
kau dëa di dungu goonliba.
2. Gadu seei dau di Wöutu fëen,
fuu sa sabi soni fëen.
Hii dee son' di sikifi nëen,
de wë sa mbei u tan nëen së.
3. Gadu Wöutu hën heepiu tu
fuu ko sabi'i lobi fëen.
Eeu lesiën hiniwan daka,
woo dëa di pasi fuu Tata.

1. Sömëni milion Kotoigi
dë a Jehovah së,
nöö hii de tuu ta haikëën,
ta du dee son' dia kë.
Tea hia baaa ku sisa
dë a di goonliba.
A hii köndë ka Kotoigi dë,
u ta gafau Tata.
2. Sömëni milion Kotoigi
ta paaja wan buka,
u wan möön bumbuu libi
ka sëmbë an'o fuka.
U ta du'i pleikiwooko,
nöö nöiti wao ko wei.
Jesosi ta dau di kaakiti
fuu sa go dou ku'i lei.
3. Sömëni milion Kotoigi
dë a di goonliba,
nöö de ta dini Gadu
ndeti ku didia.
Di Könuköndë buka
hën wë u ta paaja.
Gadu hën teeu fuu sa wooko dëën
a hii di goonliba.

1. Jehovah lobi hii libisëmbë tuu.

An ta buuse na wan u dee föluku.

A ta mbei tjuba kai.

A mbei di sonu tu.

Hiiu tuu seei Gadu ta sölugu.

Eei si wan pootiwan dëa wan fuka fëën,

hën'i mbei möiti fii heepiën ku'i fuka dë.

Jehovah o pakai.

Joo si fa joo ta wai

taai du soni kumafa a kë.

2. Teu du wan bunu soni da wan sëmbë,

kandë wan piki soni u seeka dëën.

Alwasia dëu mati,

alwasi wa sabiën,

di soni dë o tja wini ko.

Teu ta kai sëmbë ko a di wosu fuu,

u ta djeesi sëmbë kuma Lidia.

Jehovah seei ta si

dee möiti deeu ta mbei

fuu tei sëmbë ku wai a wosu.

*U ta du soni makandi
kuma wan famii*
(Efeise 4:3)

1. A goonliba lobi an dë,
ma Jehovah tjaau ko nëën së.
U ta libi bunu ku'useei,
nöö u ta dë ku wai.
U ta dë makandi
ku wan pakisei.
Gadu dau wan wooko fuu du,
nöö di Mii fëën ta dë kuu tu.
U dë sëmbë di de ta tii,
nöö u ta libi fii.
2. Lei taa i'abi sutifasi.
Tei dee fasi Gadu lobi.
Heepi wotowan te i sa.
Hën dau ta libia wan.
Boo ta dini Gadu.
Boo dë makandi.
Teu lobi dee baaa ku sisa,
woo ta wai teu dëa de bandja.
Gadu hën wë tjaau ko a wan
a hii di goonliba.

102

Heepi dee swakiwan

(Tjabukama 20:35)

1. So fuu ta ko swaki seei
a di biibi fuu.
Ma Jehovah an'o disau,
u dia lobiu tuu.
Hënseei ta tjali kuu,
an kë soni mitiu.
Fëen mbei boo mbei möiti fuu
heepi wotowan.
2. Sou dee baaa ku sisa fuu
ta lasi hati.
Eeu ta fan suti ku de,
woo sa heepi de.
Haika te de ta fan.
Heepi dee swakiwan.
Gaduo da de kaakiti,
nöö ao dë ku de.
3. Na kuutu dee swakiwan,
nöö na mbei de fa.
Heepii musu heepi de
te de dëa fuka.
Boo da de taanga tu.
Boo du andiu sa du.
Teu mbei möitiu heepi de,
nöö deo dë ku wai.

103 *Gadu da u womi di sa tja u* (Efeise 4:8)

1. Gadu buta womi di ta tja
hii dee sikapu fëen.
Nöö de ta heepiu fuu sa waka
hii ten a'i pasi fëen.

(PIKI U DI KANDA)

*Gadu dau womi diu sa futoou.
Womi di lo' Gadu tu.
Nöö de ta booko de hedi kuu.
Boo ta lobi hii de tuu.*

2. Sëmbë di ta fii da wotowan,
di ta fan suti kuu.
Te u ko swaki, de ta biinga
u de sa heepiu tu.

(Piki u di kanda)

3. Dee womi'aki ta dau köni lai,
nöö de ta heepiu tuu.
De ta mbe'u dini Gadu ku wai.
Hii ten de ta dë kuu.

(Piki u di kanda)

104 *Gadu ta da u di santa jeje fëen* (Lukasi 11:13)

1. Gadu Jehovah, i wë ta heepiu,
nööi bigi möön'i zöndu hati fuu.
Ku'i santa jeje, kuën i ta heepiu,
fuu sa hoi dou te fuka ta mitiu.
2. Sömëni pasi u ta mbei föutu,
nööu ta tjali, wa ta saanfau du.
Gadu Jehovah, ju u ta begi.
Dau paadon tu u hii dee zöndu fuu.
3. Te u ta tjali, te u lasi'ati,
ju hën ta ko ta dau degi'ati.
Taata Jehovah, ju nöö sa heepiu.
Na go disau. Dau di kaakiti fii.

1. Gadu lobi hii pei sëmbë.
 Bëibel taa: 'Hën da lobi.'
 Nöö u musu djeesi Gadu.
 Lobi fuu musu dëu si.
 Boo ta lobi hii pei sëmbë.
 Boo mbei de ta fii bunu.
 Lo' sëmbë kuma Jesosi,
 ku dee soni deei ta du.
2. Tei lobi di Wöutuu Gadu,
 nöö joo ko ta lo' sëmbë.
 Gadu seei o dau wan maun tu,
 fuu sa tei dee fasi fëen.
 Teu lobi wan sëmbë tuutuu,
 wao du soni u hatiën.
 Boo lobi dee baaa ku sisa,
 kumafa Jehovah kë.
3. Te wan sëmbë du wan soni,
 hën di soni dë hatii,
 na lukua di soni dia du,
 du kuma di Gadu fuu.
 A ta du soni ku lobi.
 Tei fuka, ao ko heepii.
 Eei ta lei taai lobi sëmbë,
 nöö joo feni wini fëen.

1. U kë ta djeesi di Gadu fuu
a hii dee fasi dia abi tuu.
Fëen mbe'u ta begi hiniwan ten
sö taau sa feni di lobi fëen.
Ma ee wa abi di lobi dë,
nöö wao dë kumafa Gadu kë.
Boo du hii soni di u sa du,
nöö woo sa ko abi lobi tu.

2. Eeu lobi sëmbë wao hoi dea bëë.
Wao du dee soni diu wanwan kë.
Woo heepi de, woo ta lobi de.
Jesosi seei leeu di lobi dë.
Fëen mbe'u kë lei taa u lo' sëmbë.
Di lobio mbei taa pasensi dë.
Di son' dëo heepiu, nöö wao disa.
Di tuutuu lobi'aki an'o kaba.

107 *Jehovah lei u andi da lobi* (1 Johanisi 4:19)

1. Jehovah ta leeu fau musu ta lobi
 hii sēmbē. Hën a kë.
 Jehovah ta leeu fau musu ta libi
 a di fasi di a lobi.
 U dia lobiu tuu, mbei a dau di Mii fëën.
 Ee an bi du sö, nöö hiiu tuu bio dēdē.
 A tja wini ko da hii libisēmbē.
 Gadu lobiu. Wë hën da lobi.
2. Teu mbei möiti fuu sa lobi Jehovah,
 woo lobi wotowan.
 Teu ta feni ten da dee baaa ku sisa,
 deseei o si taau dē famii.
 Jehovah ta leeu di son' de kai lobi.
 Tei lo' wotowan, i ku deo dē mati.
 Woon ta du soni, woon ta dē makandi.
 Hën da lobi, di tuutuu lobi.
3. Lobi hën ta mbei u ta dē makandi,
 nööu ta dē wan famii.
 Jehovah ta kaau ko lei and' da lobi.
 Hën u ta si, hiiu tuu ta si.
 Boo mbei möiti fuu ta waka ku lobi.
 Di Bëibel ta leeu fuu waka ku Gadu.
 Lobi hën o mbei wa disa di pasi.
 Gadu lobiu. Boo djeesi Gadu.

1. Gadu ta lei hiiu tuu
taa a lobi hii sēmbē tuu.
A manda di Mii fēen ko dau,
nöö a paka di zöndu dau.
Teego libi hēn woo feni,
nöö u tuu o ta libi fii.

(PIKI U DI KANDA)

*Ko be Gadu dai wata,
wata di sa dai libi.
Tei ko, nöö iseei o si
taa Gadu lo' sēmbē.*

2. Gadu seei da lobi.
Söu ta sia dee son' di a mbei.
Jesosi ko dē Könu fuu,
nöö u sabi ta'ao heepiu tu.
Gadu seti hii soni kaa
fuu sa libia di goonliba!

(Piki u di kanda)

3. Gadu ta lei hiiu tuu
taa di lobi fëen bigi tee.
Teu ta heepi hii pei sëmbë,
Gadu hën u ta djeesi dë.
Boo ta dini di Gadu fuu.
Boo peleiki da sëmbë tu.

(Piki u di kanda)

109 *Boo lobi useei ku hii u hati* (1 Petuisi 1:22)

1. Gadu kë fuu lobi useei.

Teu ta du sö, nöö ao ta wai.

Teu lobi sëmbë, woo ta djei
di waiti Gadu fuu.

Ee di lobi dë au hati,
u ku sëmbëo dë gaan mati.

Wao ta ganjan dee mati fuu.

Woo lobi wotowan.

Te u mati dëa fuka,
nöö woo heepiën ku di fuka fëën.

U lobi di mati fuu,
hii juu woo dë nëën bandja.

Jesosi leeu fau musu dë,
fuu sa ko dë kumëën Tata.

Boo ta mbei möiti hii daka.

Boo ta fii da sëmbë tu.

Boo ta djeesi'i Gadu fuu.

110 *Jehovah hën ta mbei u ta piizii*

(Nehemia 8:10)

1. Di ten ta dou ka Gaduo tii goonliba.
Hën'i buka dë u ta konda.
Boo dë ku wai, biga di juu ko zuntu,
ka woo kumutu a fuka!

(PIKI U DI KANDA)

Jehovah hën ta mbei u ta piizii.

Woo kanda gafa'i Gadu fuu.

Boo wai taa ao mbei u feni gaan bunu.

Hën da'i Könu di ta tii u tuu.

Jehovah hën ta mbei u ta piizii.

Di makiti fëen bigi tee.

Woo dini Jehovah, hën da'i Gadu fuu.

Boo du hii soni dia kë fuu du.

2. Boo dë ku'i mëni taa Jehova'o heepiu.
Nöö be wa fëëë andio pasa.
Boo hopo taanpu, kanda da Jehovah.
Kanda wan suti kanda dëen!

(Piki u di kanda)

111 *Dee soni dee ta mbei u ta wai*

(Mateosi 5:12)

1. Sömëni soni dë diu lobi.
De hia te dean sa konda.
Dee sëmbë di Gadu ta hai ko,
kumutua hii sëu goonliba.
Di piizii di mi kui ta piizii,
ta lei taa u tei ën'u bigi.
Di Wöutu u Gadu ta heepiu.
Hën ta puuu a hii dee fuka.
U sa faandi mbei u ta wai sö,
u sa' taa Jehovah dë kuu.
Alwasi fuka ta ko mitiu,
u sa' taa Jehova'o tjubiu.

(PIKI U DI KANDA)

*Jehovah da'i Gadu di mbeeu.
U wai ku dee son' deea ta leeu.
Di makiti fëën, di fa a köni,
ta lei taa hën mbei hii soni.*

2. U wai taa a mbei di goonliba.
Hën seei mbei dee fisiu wata.
U ta si dee soni dea mbei tu,
teu luku dee sonia liba.
Ku piiziiu ta paaja wan buka.
Wan buka da hii goonliba.
U ta kai sëmbëu de ko haika,
dee wini di de o feni.
Woo feni di libi u teego.
A dë fëën a pasi ta ko.
Di son' di Gadu bi paamusi,
o mbei taa mi kui o ta wai.

(Piki u di kanda)

112 *Jehovah da di Gadu u bööböö libi*

(Filipi 4:9)

1. Jehovah u Tata,
i ta dau kötöhati.
I ta dau di santa jeje.
Hën ta mbei u ta ko fii.
I dau Jesosi tu.
Hën da'i Mii fii di'i lobi.
Dau di taanga fuu sa dinii,
fuu sa dë wan mati fii.
2. Di santa jeje fii,
hën ta dau di köni fii.
Teu ta lesi sonia Bëibel,
nöö woo feni wini fëën.
Di ten di dë ta ko,
sëmbë an'o ta feti möön.
Teu mbei möitiu libi bunu,
hii sëmbë o feni böö.
3. A hii di goonliba
sëmbë dë di ta dinii.
Nöunöu hiiu tuu dë makandi,
nöö u tuu ko dë famii.
Di Könuköndë fii,
hën o mbei sëmbë ko fii.
Libisëmbë o ta piizii,
nöö joo puu dee fuka fuu.

113 *Jehovah o mbei u ta libi fiifii* (Johanisi 14:27)

1. Gadu o mbeeu libi fii
 a hii goonliba.
 Sëmbë an’o ta feti möön,
 hogidu kaba.
Jesosi o heepi tu,
 nöö hën’o dë ta tii.
Te ao seti hii soni,
 hii sëmbëo ko fii.
2. Gadu leeu fuu lo’ sëmbë,
 wa ta buuse de.
Te dean libi bunu kuu,
 wa ta kosi de.
U di Gadu leeu soni,
 wa ta feti möön.
Wa ta suku toobi tu,
 u kë feni böö.
3. Gadu seei ta dau wan maun
 fuu du andia kë.
A ta dau kötö’ati tu,
 teu ta ko nëën së.
Sonio waka bunu dau,
 a di goonliba.
Na wan fuka o dë möön,
 hii de tuu kaba.

1. Jehovah Gadu santa.

An kë u sëmbë poi'en në.
Maa hii sëu di goonliba,
sëmbë ta taki hogi fëen.
Jehovah an ta buuja,
a ta hoi pasensi tu.
A lobi libisëmbë,
nööa kë de tooka tu.
A këu de feni libi.
A kë u hii de tuu ko fii.
Fëen mbei a dë ta wakti,
sö taa de sa feni tjubi.

2. Te'useei abi pasensi,

woo sa libi ku wotowan.
Wao ta luku dee föutu
u dee baaa ku dee sisa fuu.
Ao heepiu fuu sa hoi'useei
te wan sëmbë ta du kuu.
Wao kuutu na wan sëmbë,
woo djeesi'i Gadu fuu.
Jehovah seei o heepiu.
Ao dau di santa jeje fëen.
Nöö teu ko'abi pasensi,
woo libi kumafa a kë.

115 *Tei ën u bigi taa Gadu abi pasensi* (2 Petuisi 3:15)

1. Ke u Tata, Jehovah Gadu,
u sabi taa i lobiu tu.
Hogidu fuu di goonliba,
ma i ta bookoi hedi kuu.
Sëmbë ta mën' taa si ja ta si,
ma'abiti möön joo du wan soni.

(PIKI U DI KANDA)

Pasensi fii hën bigi sö.

Di ten ta ko ka wao tjali möön.

2. Wan dusu jaa, da wan daka fii,
nöö a ta djei kumaa longi.
Di daka fii dë a zuntu,
ka joo ko puu hii hogidu.
Te wan sëmbë fii du wan hogi,
nöö i ta dëen paadon eea tjali.

(Piki u di kanda)

1. Jehovah Gadu, jua' hii makiti.
Fëen mbei m'ta lespekii.
Nöö hiniwan ten, ia' sutifasi.
Di son' dë ta mbei m'ta lobii.
2. Di Mii fii ta si fau ta tja fuka.
Fëen mbei a kë heepiu.
Wanlö soni dë di ta hebi dau.
Fëen mbei wëi si a ta dë kuu.
3. Hiiu tuu o ko dë kuma'i Gadu fuu,
teu djeesi Jesosi.
Boo lei sëmbë taa ua' sutifasi,
nööu ku de o ta libi fii.

117 *Ko abi di fasi de kai bunuhati*

(2 Kloniki 6:41)

1. Wë Jehova'u dë ku tangi
u di bunuhati fii!
Nöö i santa, ja ta tooka.
Söi bi dë longi ten kaa.
I ta dau paadon u zöndu.
Hii ten seeii ta tjali kuu.
Fëen mbei Taata, ju'u kë djeesi
a dee bunu fasi fii.
2. U ta si dee fasi fii tu
a dee sëmbë deei ta tei.
De ta wooko, de ta pleiki,
de ta paaja'i tuutuu lei.
Hii dee soni deei bi lei de,
hii de tuu de ko ta du.
Be di santa jeje heepiu
fuu koa' bunuhati tu.
3. Dau di taanga fuu sa heepi
hii dee baaa ku sisa fuu.
Wa kë buuse na wan sëmbë.
U kë lobi hii de tuu.
Teu dëa staati, teu goa wosu,
a siköö, te u ta böö,
u kë lei taa u ta djeesii
a dee bunu fasi fii.

*„Heepi u be di biibi fuu
ko möön taanga”
(Lukasi 17:5)*

1. Jehovah u da zöndu libisembë.
Fëen mbei a taangau du soni di'i kë.
Ma wa kë mbei di biibi fuu ko swaki.
Wa kë dë sëmbë di zöndu ta tii.

(PIKI U DI KANDA)

*Jehovah Gadu, ju wë u ta begi
fii dau di biibi diu musu abi.*

*Dau taanga tu, biga i nöö sa heepiu,
nöö joo sa wai ku soni diu ta du.*

2. Jehova'i sabi taa woo ta mbei föutu,
ma tökuseei i ta si'i biibi fuu.
Fëen mbei woo du hii soni diu sa du dai,
nöö wao ta fëëë, ma woo ta dë ku wai.

(Piki u di kanda)

1. A'i ten di pasa, hën Gadu bi tei
sëmbë di ta tja'i buka fëen.
Tide Jesosi ta mbei sëmbë jei
dee son' di hën Tata kë.

(PIKI U DI KANDA)

*Boo mbei möiti be wa disa,
fuu ko ta möön biibi Gadu.
Eeu ta biibi taanga tjika,
nöö woo sa feni libiu teego tu.*

2. Ku wai u ta pleiki'i bunu buka.
Sö Jesosi taau musu du.
Degi'ati ta heepiu fuu ta konda
dee bunu Gadu o du.

(Piki u di kanda)

3. Ee'i biibi fuu taanga, wao ta panta,
nöö nöiti woo hai baka go.
Futoou a Jehovah, hën'o tjaau pasa.
Di daka fëen dë ta ko.

(Piki u di kanda)

*U musu abi saapifasi
kuma Jesosi*
(Mateosi 11:28-30)

1. Jesosi bi libi a goonliba'aki.
A du hii soni di Jehovah taki.
Nöiti wan daka seei a bi mbei bigi.
A bi ta du soni ku sakafasi.
2. Sëmbë di bi swaki a bi ta kula.
A bi heepi sëmbë di dë ku fuka.
Tea bi si taa wan sëmbë dë ta tjali,
nööa bi ta heepiën faa feni kaakiti.
3. Boo lei taa u lobi dee baaa ku sisa.
Boo djeesi Jesosi, waka nëën baka.
Useei kë lei taa u'abi saapifasi.
Te sëmbë ta lukuu, hën de musu si.

1. U lo' Jehovah ku hiiu hati tuu.
Ma zöndu ta mbei taa a ta taanga dau.
Eeu ta mbei möiti fuu dwengi'useei,
nöö woo sa libi ku'i tuutuu lei
2. Saatan ta pooba u puuu a'i pasi.
Di zöndu sinkii fuu kë tjaau go lasi.
Wöutuu Gadu ta dau kaakiti.
Ee na Jehovah, wao sa wini.
3. Dee son' deeu ta du sa poi Gadu në.
Fëen mbei woo du soni kumafa a kë.
Dwengi iseei fii sa du bunu.
Tja'iseei a'i pasi u Gadu tu.

1. Sëmbë ta fuka a di goonliba.
Sëmbë ta tjali, nöö de ta pena.
Wa musu mbei sëmbë kisiu ganjan.
Boo ta dë seekaseeka.

(PIKI U DI KANDA)

Boo taanga di biibi fuu.

Woo si andi Gaduo du.

Abiti möön woo fii.

Wakiti, nöö joo si.

2. Saatan goonliba hën ta kë ganjan'u.
Mau musu köni ku son' dia kë dau.
Wa musu lobi dee hogi soni
dee an ta kai ku Gadu.

(Piki u di kanda)

3. Dini Jehova'a hii sëu goonliba.
Di kaba zuntu, ja musu disa.
Paaja di buka be hii sëmbë jei.
Kandë deo kë tei di lei.

(Piki u di kanda)

*Saka iseei
a di tii u Gadu basu*
(1 Kolenti 14:33)

1. Dee sēmbēu Jehovah a hii goonliba
ta wooko makandi, ta paaja'i buka.
Gadu tei so sēmbē u de tei fesi,
nöö u tuu ta haika dee sēmbē aki.

(PIKI U DI KANDA)

*Hoi'seei a Gadu, saka iseei tu,
hën u musu ta du.
Gadu ta heepiu, hën ta tjubiu tu.
Boo haika di Gadu fuu.*

2. Gadu dau wan saafu, nöö a dëu futoou.
U ta feni heepi, de ta dau wan maun.
Gadu ta dau taanga ku di jeje fëen.
A ta dau di köni fuu sa wooko dëen!

(Piki u di kanda)

124 *Boo ta hoi useei a Jehovah* (Psalöm 18:25)

1. Boo ta hoi'useei a Jehovah
ku dee soni deeu ta du.
U da sëmbë u Jehovah.
Boo ta gafa'i Gadu fuu.
U kë ta du hii dee soni
di Jehovah Gadu kë.
Hën ta heepiu, hën ta tjaau tu.
U kë dëa di pasi fëën.
2. Boo ta hoi'useei hiniwan ten
a dee baaa ku sisa fuu.
U kë si de kuma mati.
Boo lespeki hii de tuu.
Boo ta libi bunu hii ten
ku dee baaa ku sisa fuu.
Boo dë mati, be wa paati,
nöö woo dë kuma famii.
3. U kë haika hii dee soni
di dee baaa ta konda dau.
De ta heepiu fuu sa hoi dou.
U ta si fa de ta tjaau.
Woo ta feni hii dee wini,
nöö woo feni libi tu.
Boo ta biinga, fuu sa hoi'useei
a Jehova'i Gadu fuu.

125 *„Dee sëmbë dee abi tjalihati
u wotowan, o ta dë waiwai”*
(Mateosi 5:7)

1. Jehovah lo' hii sëmbë tuu.
 Hii ten seei a ta tjali kuu.
 A lo' u da sëmbë soni tu.
 U ta si fa'a ta söluguu.
 Ee zöndu seei wan sëmbë du,
 hën'a ko ta buuse'i hogidu,
 Jehovah seei o tjali kuën,
 ao dëen paadon'u di zöndu fëen.
2. Teu dë ku wanlö fuka fuu,
 Jehovah seei hën ta ko puuu.
 Di lobi di a abi dau
 ta mbei a ta dau paadon tu.
 Nöö sö wë u musu ta du
 te sëmbë du wan soni kuu.
 Teu lei taa ua' tjali'ati tu,
 hii daka woo ta fii bunu.
3. Teu heepi wan sëmbëa soni,
 wa musu ta suku tangi.
 Na fëëkëtë, Gadu ta si
 tei heepi baaa ku sisa fii.
 Jehovah taa an'o go disai,
 ao heepii fii ta dë ku wai.
 Tei lei taa ia' tjali'ati tu,
 hën dai ta djeesi'i Gadu fuu.

1. Boo ta köni a di ten'aki,
 fuu sa dou tea di kaba.
 Hii fa'i goonliba ko hogi,
 Jesosi o tjaau pasa.
 Boo ta haika andia taki tu.
 Hën da wan'u dee son' diu musu du.

(PIKI U DI KANDA)

*Boo ta köni, boo ta hoi taanga,
 fuu sa dou tea di kaba!*

2. Boo ta köni a di ten'aki
 fuu sa saandi ta pasa.
 Te di köni saafu dau lai,
 nöö u musu ta haika.
 Eei si taa ja fustan wan soni,
 nööi sa go a wan'u dee gaanwomi.

(Piki u di kanda)

3. Boo ta köni a di ten'aki.

Boo ta pleiki da sëmbë.

Nöö woo lei taa ua' degi'ati.

Woo sa hei Jehovah në.

Hopo taanpu, ko boo waka go.

Biga'i dakau Gadu hën ta ko.

(Piki u di kanda)

1. Andi mi sa du dai? Andi mi sa dai
u lei taa mi lobii, u dee son' deei ta du?
Sömëni soni dëa di Wöutu fii dendu.
Dam' köni u mi sa libi ku hii de tuu.

(ABA)

Mi bi mbei wan buka taa mio ta dinii.
Nöö mao bia baka. Mao disa'i pasi fii.
Mio du hii dee soni kumafai taki.
Mio mbei hii möiti fii sa wai ku mi.

Be mi si mi föutu. Heepim' be mi si,
sö taa mi sa tooka soni di ja lobi.
Mi kë hoi miseei. Mi kë fii heepi mi tu.
Mi kë dë wan sëmbë di ta libi bunu.

1. Dee son' dee Gadu paamusiu
ta mbei u ta hoi dou.
Dee son' dee dëa di Wöutu fëen
ta taanga'i biibi fuu tu.
Di daka u Jehovah seei
ta ko zuntu. Boo biinga.
Teu mbei möiti fuu hoi go dou,
di son' dë o tjaau pasa.

2. Alwasi a ta taanga dai,
mbei möiti fii hoi dou.
Na fëëkëtë di Gadu fii,
alwasi tesi ta ko.
Di goonliba ko hogi seei,
tökuseei ja musu wei.
Jehova'o dai di köni tu.
Joo sa du dee son' deei lei.

3. Abiti möön di dakao dou,
ka Gaduo mbe'u ko fii.
Ee në fii dëa di buku fëën,
joo feni libiu teego.
Boo biinga, boo mbei möiti tu
a hii soni diu ta du.
Jehovah Gadu an'o disai.
Hii ten joo ta dë ku wai.

1. Te fuka mitiu,
 unfau sa feni kaakiti?
 Djeesi Jesosi
 di bi ta luku goa fesi.
 Dee bunu u Gadu
 a bi ta wakiti.

(PIKI U DI KANDA)

Hiiu tuu musu ta hoi dou,

fuu feni di libi.

U si fa Gadu lobiu.

Fëën mbei wao go disa di pasi fëën.

2. A ta dau tjali,
 teu luku fa di libi dë.
 Wan daka ta ko,
 woo feni'i libi diu bi kë.
 Boo hoi dou, boo biinga
 fuu dë a Gadu së.

(Piki u di kanda)

3. Wa musu ta fëëë,
na ten'u disa Jehovah go.
Boo ta wakiti,
di daka fëën hën wë ta ko.
Tai hati, mbei möiti.
Di daka dë ta ko.

(Piki u di kanda)

1. U Tata Jehovah

mbei di Mii fëen dëdë dau,
faa sa dau paadon u zöndu,
faa sa puuu a dëdë maun.

Eeu tjali teu mbei wan föutu,
nöö Jehova'ö tjali kuu.

A di nëu di Womi Mii fëen,
ao feki di zöndu fuu.

2. Eeu ta djeesi Gadu,

woo ta da sëmbë paadon.

Eeu lobi dee baaa ku sisa,
nöö woo ta da de paadon.

Boo ta libi bunu hii ten,
be wa hoi sëmbë a bëë.

Boo ta libi ku pasensi.
Hën Jehovah Gadu kë.

3. Eeu kë djeesi Gadu,

u musua' tjali'ati tu.

Na ta hoi sëmbë a hati,
nöö na buuse wotowan.

Be di lobi fuu koa fesi,
be Jehovah Gadu si.

Be wa luku soni fini,
nöö Jehova'ö dëu mati.

1. Tide u tuu ta si
tu sëmbë ko dë wan.
De ko a Gadu fesi,
dii tatai ko a wan.

(PIKI U DI KANDA 1)

*Di womi soi da Gadu
ta'ao lobi hën mujëë.
Sëmbë an musu paati
and' Gadu tja koa wan.*

2. De kë du hii soni
kumafa Gadu kë.
De kë di tiiu Jehovah,
de lo' di Wöutu fëën.

(PIKI U DI KANDA 2)

*Di mujëë soi da Gadu
ta'ao lobi hën manu.
Sëmbë an musu paati
and' Gadu tja koa wan.*

1. Diu fii sinkii da mi sinkii.

Dee bonu fii dë mi bonu tu.

Wë Gadu da mi wan mati,
hën da mi lobiwan.

I da u mi, mi da u fii,
nönöu u sa libi makandi.
U ko toon manu ku mujëë,
u ko dë wan famii.

Woo ta dë ta dini'i Gadu fuu.
Woo ta waka kuën,
nöö'i lobi fuu an'o kaba.

Tide mi kui mbei wan buka.
Mio ta lobii möön jaa ta pasa.
Wë boo ta gafa Jehovah.
I da di sëmbë dim' lobi.

133 Dini Jehovah a dee njönku jaa fii

(Peleikima 12:1)

1. Gadu ta wai ku dee dinima fëen.
Hii fa u njönkuu ta du soni dëen.
Hiiu libi longi u ta kë gafëen.
Bunu woo feni teu dëa Gadu së.
2. Ee u ta haikau mama kuu tata,
nöö a sa heepiu fuu dou di'amanjan.
Gadu ku libisëmbë o lobiu.
Woo ko dë matiu Jehovah Gadu.
3. Boo mëni'i Gadu fuu te u njönku.
Boo ta möön lobi di Wöutu fëen tu.
U kë gafëen ku hii dee köni fuu.
Gadu o wai ku dee son' deeu ta du.

134 *Miii da wan gudu di Gadu da i* (Psalöm 127:3-5)

1. Te wan womi ku wan mujëë
pai wan mii, nöö de ta wai kuën sö tee.
Wan gudu di Jehovah da de,
ma de musu ta köni kuën.
Jehovah hën ta dau di libi,
u musu lei taau tei ën u bigi.
Mama ku tata musu haika
fa Gadu kë u de kiija miii.

(PIKI U DI KANDA)

*Gadu hën dai di waiti mii dë.
Lei ën soni di Gadu kë.
Tei ën'u bigi. Da Gadu tangi.
A dë wan gudu di'i feni.*

2. Hii dee soni Gadu taki,
hii de tuu musu ta dëa'i hati tu.
Hën'i musu konda da dee mii fii
u de sa saand' de musu du.
Ta lei de tei ku de dëa pasi,
te'un ta waka, te woon go kandi tu,
nöö joo si taa te de ko bigi,
deo sa ta dini di Gadu fuu.

(Piki u di kanda)

Jehovah taa:
„Baa o, libi a wan köni fasi e”
 (Nöngö 27:11)

1. Un dee njönkuwan,
 mi ta kaaunu ko a mi.
 Un du andim' taki,
 nöö hii sëmbë o si.
 Eei disa so soni
 fii sa ko dini mi,
 joo lei di goonliba
 taa mi wë i lobi.

(PIKI U DI KANDA)

*Mi womi mii, di mujëë miiu mi,
 un libi kumafa mi kë.
 Nöö lei taa iseei hën kë dinim',
 ma nau di sëmbë ta pikii.*

2. I musu ta piizii
 u du soni da mi.
 Mio heepii alwasi
 i mbei wan föutu seei.
 Ee sëmbë ta du kui,
 ta libi hogi kui,
 nöö sabi taam' lobii,
 nöö mao sa go disai.

(Piki u di kanda)

*Jehovah o mbei i feni
„gaan bunu”
(Luti 2:12)*

1. Jehovah ta wai ku dee dinima fëen,
di lobiën ku hii de hati.
A sa' taa so juu a ta taanga da de
u du hii dee son' dia taki.
Kandë i go disa dee sëmbë fii tuu.
Dee soni dë tuu a ta si.
A dai woto sëmbë di toon i famii.
Ao mbeii feni teego libi.

(PIKI U DI KANDA)

*Be Jehovah limbo di pasi fii.
Be a heepii fii feni gaan bunu.
Be a dai köni fii hoi go dou.
Jehovah dau Gadu, Jehovah lobiu.*

2. So juu a ta taanga, so juu a nango.
So juu ja ta saanfa u du.
So daka ta dë, ka fuka ta mitii.
Dee son' dë sa mbeii kë disa.
Ma Gadu ta si fa dee son' ta pasa.
Söseei a ta jei begi tu.
Jehovah o heepii, ao dai mati tu.
Ao tiii a dee son' deei ta du.

(Piki u di kanda)

137 *Dee mujëë dee ta dini Gadu* (Loomë 16:2)

1. Sala, Ësitë, Luti, ku Malia,
ku woto kõni mujëë u fesiten,
di diniu Gadu hën de bi lobi tee.
A di Bëibel u sa lesi soniu de.
I bi abi wotowan a dendu
di bi lobi Gadu, ma wa sabi nëu de.
2. Lobi, degi'ati, biibi ku pasensi,
dee fasi'aki bi dëu si a hii de tuu.
Boo buta mënia de, si andiu sa lei.
De dë bumbuu mujëë di dë u gafa.
A di ten'aki u'abi wanlö sisa,
de seei lo' Jehovah. Boo wakaa de baka.
3. Un dee sisa dee ta dini Jehovah,
u ta si hii dee wooko dee un ta du.
Sakafasi ku lespeki dëa'unu tuu.
Hii dee soni dë Jehovah seei ta si.
Lobi sisa di ta dini Gadu,
Gaduo da'unu bunu, ao da'unu libi tu.

138 *Di waiti u dee gaan sëmbë*

(Nöngö 16:31)

1. Hii dee baaa ku sisa fuu
dee ko gaandi kaa,
de ta dini Gadu kuu.
Nöiti dean disa.
Dendu seei an ko dë möön.
A ta taanga tu.
Ke Jehovah mäni dee
wooko di de du.

(PIKI U DI KANDA)

*Gadu, i ta mäni
hii dee son' de du.
Be de tuu ko sabi
taa i wai ku de!*

2. Teu ta si dee weti'uwii,
köni hën'u ta si.
Te de dëa Jehovah së,
de ta waiti tee.
Sensi njönku jaa u de,
de ta hoi go dou.
Boo lei taau ta wai ku de.
U lobi de tuu.

(Piki u di kanda)

139 *Pakisei fa a o dë a di Paladëisi*

(Akoalimbo 21:1-5)

1. Ambëi ta si, andii ta si
tei pakisei fa di libio ko dë?
Fa joo ta wai, fa joo ta fii,
te hogidu an dëa na wan së.
Te Gaduo tii, nöö hii sëmbë
o dëa di fasi fa Gadu kë.
Di ten dou awaa da di njunjun libi.
Woo kanda da Gadu.
Woo konda fau ta fii.

(PIKI U DI KANDA)

*„Jehova’u ta wai. U ta dai tangi.
Hii dee bunu dee ta du u ta si.
Di Könuköndë fii hën wë mbei u ko fii.
Fëen mbe’u ta gafai u di fasi fai ta tii.”*

2. Tei pakisei, andii ta si?

Wan paladëisi di Gadu ta tii.

Na wan soni o mbe'u ta fëëë.

Hiiu tuu o dë a Jehovah së.

Wao dëdë möön, wao ta pena.

Hën Gadu paamusi longi kaa.

Jehovah o weki sëmëni sëmbë.

Deo weki koa libi,

nöö deseëi o gafëën.

(Piki u di kanda)

140 *Abiti möön woo libi u teego!*

(Johanisi 3:16)

1. Pakisei, mäni di ten
fa sëmbë o ta piizii.
Bööböo libi hën'i ta si,
nöo wa ta tjali möön.

(PIKI U DI KANDA)

*Mëni fa'i libio dë
teu dëa Jehovah së.
A di ten dë wao ta fëëë,
nöo wao ta dëdë möön.*

2. A'i ten dë woo ko njönku.
Hii sëmbë o lo' Gadu.
Wa ta fuka, pen kaba.
Na wan sëmbë ta këë.

(Piki u di kanda)

3. Hii sëmbë o dë ku wai
teu dëa di Paladëisi.
Woo ta kanda, ta gafa
Gadu hiniwan ten.

(Piki u di kanda)

141 *Di libi da wan foombo soni* (Psalöm 36:9)

1. Te de pai wan mii, tei ta si dee fou,
te i ta si dee waiti dan, di Gadu mbei,
hii dee soni'aki, de ta mbe'u ta wai.
Hii de tuu da foombo soni, di Gadu dau.

(PIKI U DI KANDA)

Di libi suti tee, hën mi kui ta si.

Nöou kë da Jehovah tangi ta'a dau di libi.

Alwasi andiu bi o du, nöiti wao sa pakëen.

Dee soni deea ta du, ta bigi dau sö tee.

2. Di mujëeu Jöpu, bi taki dëen taa:
„Siba Gadu dëdë go, hën'i musu du.”
Ma wa kë dë sö. Wa kë paksei sö.
U kë ta da Gadu tangi hinwan daka.

(PIKI U DI KANDA)

Di libi suti tee, hën mi kui ta si.

Nöou kë da Jehovah tangi ta'a dau di libi.

Alwasi andiu bi o du, nöiti wao sa pakëen.

Dee soni deea ta du, ta bigi dau sö tee.

*Dë seiki taa Gadu
o du dee soni dee a paamusi*
(Hebelejën 6:18, 19)

1. Sömëni jaa libisëmbë dë a dungu.

Hogidu fuu hii së u di goonliba.

Pen ku fuka u ta tja a di libi.

Libisëmbë an sa tookëen tu.

(PIKI U DI KANDA)

Ko boo kanda: Gaduo mbei u ko fii!

Wë nönöu di Könuköndë fëen ta tii.

Di Womi Mii fëen o puu hogidu.

Mi kui sa dë seiki taa ao pasa tuu.

2. Tide di daka u Gadu dë a zuntu.

Hii sëmbëo si taa di daka dë hën dou.

Abiti möön sëmbë an'o tja sitaafu.

Ko boo gafa Masa Gaangadu.

(Piki u di kanda)

143 *I musu ta du soni, ta wakiti,
ta luku pasi*
(Loomë 8:20-25)

1. Jehova'u musu ta wakiti
faa du dee son' di a taki.
U musu abi pasensi.
Dee maaka fëen u ta si.

(PIKI U DI KANDA)

*Boo mbei möiti ta du son' da Gadu.
Boo ta wakiti ku piizii.
Abiti möön woo ko fii.*

2. Jehovah buta di ten kaa.
Jesosi dë seekaseeka.
Ao puu hogidu a pasi.
Ao kii dee felantima.

(Piki u di kanda)

3. Hii fa u ta tja sitaafu,
u dë ta wakiti Gadu.
Di daka fëen ta ko zuntu.
Abiti möön nöö woo böö.

(Piki u di kanda)

*I musu ta pakisei
dee bunu dee joo feni!*
(2 Kolenti 4:18)

1. Te dee bookowojoma ta si,
te dee bookojesima ta jei,
te u dëa wan waiti goonliba,
nöö woo ta wai, woo ta baja.
Te dee sëmbë fuu o koa libi,
nöö u tuu o wai, woo ta piizii.

(PIKI U DI KANDA)

*Te u mbei möiti fuu sa dë'ala,
woo si fa de tuu o pasa.*

2. Teu si lëun ku kau dë makandi,
te dee mbeti tuu ta libi fii,
nöö wan njönku mii ta pëe ku de,
di libi seei ta suti tee.
Te di ten ko dou ka wao ta këë,
na wan hogi dë, nöö wao ta fëëë.

(Piki u di kanda)

145 *Gadu paamusi u wan paladëisi* (Lukasi 23:43)

1. Goonlibao toon wan paladëisi.
Wan dusu jaa Keesituo tii.
Zöndu ao puu, nöö wao ta dödë,
wao ta tjali, nöö wao ta këë.

(PIKI U DI KANDA)

Paladëisi a goonliba.

Jesosio tii, wao ta fuka.

Suti libi hën woo feni.

U teego seei woo ta libi.

2. Te Keesitu o tii goonliba,
dödë sëmbë o koa libi.
Deo weki ko a Paladëisi,
di son' dë Jesosi taki.

(Piki u di kanda)

3. Goonlibao toon wan paladëisi,
kumafa Jesosi taki.
Fëen mbe'u ta da Jehovah tangi
da dee bunu dee woo feni.

(Piki u di kanda)

146 *A o mbei hii soni ko njunjun* (Akoalimbo 21:1-5)

1. Dee son' deeu ta si, de ta leeu wan soni.

Di Mii u Jehovah hën dë ta tii.

A feti wini di felantima.

Ao ko faa ko seeka di goonliba.

(PIKI U DI KANDA)

Boo wai taa Gadu dëa'i së fuu.

Hënseei ta pikiu ta'ao dë kuu.

Ao puu hii fuka ku hii hogidu,

nöö wao ta tjali, wao ta dëdë tu.

Jehova'o seeka soni ko bunu.

Di son' dëu ta biibi tu.

2. Di daka ta zuntu di'i Könu o tööu.

A feni wan mujëë di dëu futoou.

Di tööu dë o tja bunu ko dau tuu.

Jehovah o wai ku di Könu fuu.

(Piki u di kanda)

3. U tuu o go miti wan möön bunu ten.

Wan ten ka sëmbë an o ta fii pen.

Nöö Jesusio tii kuma Könu fuu.

Woo ta dë ku wai, woo ta fii bunu.

(Piki u di kanda)

1. Gadu taa woo feni libi.
 A goonliba woo ta dë.
 Nöö woo sa libi u teego,
 ee u dëa Gadu së.

(PIKI U DI KANDA)

*Woo libi u teego,
 eeu mbei taanga möiti.
 Sö Gadu seei taki,
 nöö ao pasa tuu.*

2. Woo libia di Paladëisi.
 Nöö woo dë miii u Gadu.
 Na wan soni o ta toobiu.
 Hii ten woo ta lafu.

(Piki u di kanda)

3. Te sëmbëo weki koa libi,
 na wan fuu o tjali möön.
 Nöö woo si fa Gadu lobi
 hii dee sëmbë fëen tuu.

(Piki u di kanda)

148 *Jehovah wanwan tö sa heepi u*

(2 Samuëli 22:1-8)

1. Jehovah, mi ta si dee soni deei ta du.

I abi makiti.

I mbei hii soni tuu.

Na wan gadu dë kumai. Ju nöö sa ko
heepi mi.

Ju da di Gadu fuu.

(PIKI U DI KANDA)

Jehovah, i wanwan tö sa ko heepiu.

U ta si fai ta tjubi dee dinima fii.

Ua' degihati, u di'i ta dë kuu,

Wa kë disai.

la' di makiti fii puuu a fuka,

nöö hën'i ta du.

2. Te m'ta si dödë, nöö ju në mi ta kë kai.

Mi kë fii heepi mi,

nöiti mao go disai.

Mi sa' taa i ta jei mi. Ko heepi mi,
gaantangi.

Ju nöö sa mbei m'ko fii.

(Piki u di kanda)

3. Wan tōngö hën ta bai seki
di goonliba.
Jehovah hën ta ko,
felantima ta fëëë.
Ma hii dee dinima fëën ta waka ko.
De ta wai.
Gadu ko heepi de.

(Piki u di kanda)

149 *Wan kanda u gafa Jehovah te a wini feti* (Ēkisodesi 15:1)

1. Hopo boo kanda. Boo hopo kanda da Jehovah.
Egepiti sēmbē, a bi tuwē goa di ze.
Gafa Jehovah,
di makiti Gadu u mundu.
Jehovah da'i nē fēēn.
A ta wini hii feti.

(PIKI U DI KANDA)

*Di Möön Heiwan, Jehovah Gadu,
na wan gadu dē, kumafa i dē.
Abiti möön joo kii felantima.
Awa deo si andii sa du.*

2. Sēmbēa goonliba, ta hopo fia ku Jehovah.
Ma nōiti deo sa wini,
alwasi de pooba.
Te Amagedon
o dou ka Jehovah o kuutu,
nōö hii fölukuo si
andi'i Gadu fuu o du.

(Piki u di kanda)

1. Köndë ta ko a wan
u feti ku'i Salfuwan.
Di tii u de hën o kaba.
Jehovah taa a tjika.
Tiima bi tii wan ten,
ma Gadu o tii awaa.
Di Mii u Gadu o kii de puu,
nöö nöiti möön de o dë.

(PIKI U DI KANDA)

Ta suku Gadu faa tjubii.

Futoou ën taa ao dë kui tu.

Du dee son' dia kë,

ko dë mati fëen,

lei taai kë faa tii, tei hën së.

Joo si fa Gadu o tjubii

a di daka fëen.

2. A hii di goonliba
sëmbë ta jei di buka.
Wëu kë u hii pei sëmbë jei
u sabi ee de kë tei.
Tide u dëa fuka,
ma piizii o dë'amanjan.
Jehovah ta tjubi sëmbë fëën,
nöö soni an'o sa tapëën.

(Piki u di kanda)

1. Libi ko dë u wan pisiten nöö.
 Wa ko ta libi longi.
 Tide u dë, amanjan wa dë möön,
 dëdë hën wë ta kiiu sö.
 Gadu taki taa wan daka ta ko
 ka soni an'o dë sö möön.

(PIKI U DI KANDA)

*Gaduo kai dee dëdë sëmbë,
 nöö deo jei di töngö fëen.
 Deo toona ko a libi,
 nöö hiiu tuu o ta piizii.
 Eeu ta biibi, nöö woo si tu
 andi'i Gadu fuu o du.
 U teego woo ta libi.
 Boo dë piii ta wakiti.*

2. Dee dinima u Gadu di dëdë,
 hii de tuu a ta mëni.
 An'o fëëkëtë dee soni de bi du.
 Ao tja de ko a libi.
 Deseei o ko si, fa di libi dë
 a di njunjun goonliba.

(Piki u di kanda)

Dee në u dee kanda. De ta bigi ku di lètë A, nöö de ta kaba ku di lètë W:

A o kai de 151
A o mbei hii soni ko njunjun 146
A o mbei i ko taanga a di biibi 38
Abiti möön woo libi u teego! 140
Ambë da di gadu fii? 40
Ambë sa dë Jehovah mati 28
Be soni waka bunu te u ko makandi 93
Begi Jehovah hiniwan daka 47
Boo biinga ku di wooko u Gadu 64
Boo lobi useei ku hii u hati 109
Boo mbei möiti fuu go a fesi! 65
Boo ta hoi useei a Jehovah 124
Boo ta köni ta hoi taanga 126
Boo ta paaja di Könuköndë buka
nöömö! 69
Boo ta tei wotowan ku wai 85
Boo taanga di biibi fuu! 122
Da Gadu pasi faa lei i soni 86
Da u degihati 73
Da wotowan paadon 130
Dë seiki taa Gadu o du dee soni
dee a paamusi 142
Dee fasi dee Jehovah abi 1
Dee foombo soni Gadu ta du 5
Dee komakandi ta da u taanga 87
Dee mujëë dee ta dini Gadu 137
„Dee sëmbë dee abi tjalihati u wotowan,
o ta dë waiwai” 125
Dee soni a mundu ala ta lei fa Gadu
bigi tjika 6
Dee soni dee mi ta pakisei fundu
a mi hati 45
Dee soni dee ta mbei u ta wai 111
Dee soni Gadu mbei ta gafëën 11
Dee womi mii u Gadu nango a feti 27
Di begi u wan futuboi u Gadu 42

Di begi u wan sëmbë di ta fii
bookosaka 44
Di Buku u Gadu da wan gaan gudu 96
Di Könuköndë seti kaa—Be a ko! 22
Di libi da wan foombo soni 141
Di libi u wan pionili 81
Di lobi u Gadu an ta kaba 108
Di Ndeti Njanjan u Masa 19
Di njunjun kanda 62
„Di pasi hën disi” 54
Di pasi ta ko möön limbo 95
Di sëmbë di mi musu dë 127
Di waiti u dee gaan sëmbë 138
Di Wöutu u Gadu o mbei u feni libi 97
Dini Jehovah a dee njönku jaa fii 133
Dini Jehovah ku hii i libi 37
Dini Jehovah, nöö joo feni bunu 80
Du bunu da wotowan 100
Du soni u Gadu mëni di në fii 39
Gadu da lobi 105
Gadu da u di Wöutu fëën 98
Gadu da u womi di sa tja u 103
Gadu mbei de ko dë wan 131
Gadu paamusi u wan paladëisi 145
Gadu ta da u di santa jeje fëën 104
Gafa di Könu di o tii goonliba 14
Gafa di Womi Mii u Gadu! 15
Gafa Jehovah u di a salufu
di Womi Mii fëën 16
Gafa Jehovah, di Gadu fuu! 10
Go heepi 84
Go paaja di buka 67
Go peleiki a sëmbë pisi 83
Haika Gadu be i feni bunu 89
Heepi de u taanpu gingin 79
Heepi dee suwakiwan 102
„Heepi u be di biibi fuu ko möön
taanga” 118
Hoi dou te a di kaba 128
I da u di wan kodo Womi Mii fii 20
I du ën da mi 26
I musu ta du soni, ta wakiti,
ta luku pasi 143

I musu ta pakisei dee bunu
dee joo feni! 144
I ta heepi u ta taanga di biibi fuu 3
Jaa di Könuköndë sii 68
Jehovah bigi ta tii 23
Jehovah da di Gadu u bööböö libi 112
Jehovah da di Könu fuu! 9
Jehovah da di në fii 2
Jehovah hën ta da u kaakiti 7
Jehovah hën ta mbei u ta piizii 110
Jehovah hën ta tja mi 4
Jehovah hën ta tjubi u 8
Jehovah lei u andi da lobi 107
Jehovah o mbei i feni „gaan bunu” 136
Jehovah o mbei u ta libi fiifii 113
Jehovah taa: „Baa o, libi a wan
köni fasi e” 135
Jehovah wanwan tö sa heepi u 148
Jehovah, di Gadu fuu 12
Jehovah, u ta da i tangi 46
Ke Gadu o, haika di begi u mi 41
Keesitu sëmbë ta buta de libi
a Gadu maun 52
Ko a di kuun u Jehovah 24
Ko abi di fasi de kai bunuhati 117
Ko abi di fasi de kai lobi 106
Ko abi pasensi 114
Ko boo gafa di Gadu fuu 59
Ko boo kanda di Könuköndë kanda! 74
Ko sabi andi da dee möön fanöudu
soni 35
Konda unfa i ta fii 76
Lei mi di pasi fii 88
'Lei sëmbë soni u Gadu Wöutu' 78
Libi fuu musu dë kuma wan faja limbo 82
Libi ta ko 60
Limbo dë a wan dungu goonliba 77
Manda mi, mi o go! 75
Mbei Jehovah tii di libi fii 56
Mi buta mi libi a Gadu maun! 51
Mi kë dini i hii mi libi longi 50
Mi Mati, mi Gadu, mi Tata 30
Mi o hoi miseei a dee wëti fii 34

Miii da wan gudu di Gadu da i 134
Milionmillion Kotoigi 99
Na fëëë! 55
Paaja di buka u di Könuköndë 72
Paaja di bunu buka da sëmbë 66
Pakisei fa a o dë a di Paladëisi 139
Peleiki da hii pei sëmbë 57
Saka iseei a di tii u Gadu basu 123
Seeka iseei fii go peleiki 53
Suku di Könuköndë fosu 21
Suku Gadu faa sa tjubi i 150
Suku sëmbë di kë sabi soni u Gadu 70
Suku sëmbë di lobi Gadu 58
Tei ën u bigi taa Gadu abi pasensi 115
Tei Jehovah së! 32
Tuwë dee hebi fii da Jehovah 33
U bi du ën ku lobi 91
U da Jehovah Kotoigi! 63
U kë dë kuma Keesitu 13
U kë u Jehovah ta dë waiwai 49
U ko dë wan sinkii 132
U musu abi biibi 119
U musu abi saapifasi kuma Jesosi 120
U musu abi sutifasi 116
U musu ta da useei taanga 90
U musu ta duwengi useei 121
U ta begi i u da i tangi 43
U ta du soni makandi kuma wan famii 101
U ta feti da Jehovah! 71
U ta tja di në u Jehovah 29
U ta tjubi di hati fuu 36
U tei di lusupaima u bigi 18
U wai taa i da u di Wöutu fii 94
Un dee Kotoigi, un tai hati! 61
Waka ku Gadu! 31
Waka ku Jehovah hiniwan daka 48
Wan apaiti gudu 25
Wan kanda u gafa Jehovah
te a wini feti 149
Wan wosu di ta tja di në fii 92
„Wë mi kë” 17
Woo hoi dou 129
Woo libi u teego 147